

處州府志

ル 5  
1573  
20





九 3 5  
號 1573  
卷 20



處州府志卷之二十一

處州府知府元和潘紹詒重修

人物志中

文苑 藝術

隱逸 方外

流寓

文苑

文以載道藏之名山傳諸後世固與韻籍殊科若風雲月露陶寫性情亦文人之餘事所謂風流儒雅亦吾師也然士先器識而後文藝與其人以文傳曷若文以人傳也儒林文苑豈竟分途哉

宋

祝顏字景深麗水人以八行貢太學大觀中以舍選登



進士嘗試孟軻勇於義賦膾炙人口時號祝孟子終  
宣教郎

姜特立字邦傑麗水人靖康中父綬死於難補承信郎  
累遷福建路兵馬副都監海賊姜大獠寇泉南特立  
以一舟先進擒之帥臣趙汝愚薦於朝召見獻所爲  
詩百餘篇除閤門舍人充太子宫左右春坊兼皇孫  
平陽王伴讀由是得幸於太子太子卽位除知閤門  
事復除浙東步馬副總管甯遠軍節度使有梅山集  
胡升字子上麗水人初任彭澤丞工詞章終湖北提舉  
紹興初郡守耿延禧創譙門委譔上梁文并記刻石

畢以錢十萬酒百壺饋之辭曰余雖貧終不爲一譙  
門所鬻邦人高之

俞文豹字文蔚栝蒼人四庫全書吹劍錄外集提要云  
其始末未詳所作先有吹劍錄故此曰外集卷首有  
涓佑庚戌序稱續三爲四以驗其學之進否則中間  
尙有二編今已佚矣按序及提要均稱栝蒼唐大厯  
十四年改栝蒼爲麗水宋因之無變更舊志不載因  
補列麗水人物並按卷末自題云余有三恨一無子  
二無助三無成抱茲苦心娛以文字旣絕筆於斯錄  
復長吟以繫之詩云可笑春蠶有許癡年年辛苦爲



他誰恰如貧女拋梭了挂體何曾有一絲天不奈何  
無可問世皆如此有誰聽爲儂指點春知處惟有青  
楊眼獨青

林椅字奇卿麗水人紹熙進士淹貫經術以周禮爲周  
公經世之書凡民極所由立日用之常誠僞之變莫  
不區別纖悉畢備椅乃隨類修列之名曰周禮綱目  
調紹興府教授時翰林學士樓鑰禮部尙書倪思表  
其所著進奏除刑工部架閣

葉禔字天祺麗水人問學該博文詞典贍任上饒縣簿  
時馬光祖守建康兼江東安撫使辟至幕府多所贊

畫梁椅華登雲朱天民吳楊皆出其門

梁椅字子奇麗水人嘉熙進士時甫弱冠蚤脫場屋遂  
得潛心講貫力於爲文尤精四六晚歲慕程朱之學  
編輯遺論名論語翼除太常寺丞權禮部郎官

俞來字舜咨麗水人太學詞賦有聲官至國子錄

葉夢雲字天游麗水人

麗志雲作登

博學多識以文學鳴嘗

哀輯諸儒論史精語爲一篇名曰通鑑發揮中景定  
三年進士爲吉安教授

蔣存誠字遂明青田人好學工文詞登崇甯五年進士  
歷官國子祭酒知饒州建炎間封開國子食邑二百



戶著國子先生集

陳汝錫字師予青田人幼穎悟善屬文或以其詩示黃庭堅有閒愁莫浪遣留爲痛飲資黃擊節稱賞曰我輩人也登紹興四年進士邑之登第者自汝錫始提舉福建學事官至浙東按撫使贈中奉大夫有鶴溪集十二卷子棣以父蔭任潭州通判著蒙隱集

林越字伯仁青田人父通本龍泉人流寓青田登宣和六年進士生越登紹興二十一年進士監行在諸司審計司生平學力深於漢史撮其文附以訓詁五十篇名曰漢雋其他遺文甚多一夕感夢上帝有仙官

之召無病而卒葬雪峯山弟永弼亦登第

季大老字元老青田人紹興進士任婺州錄事參軍孫申伯博學有高致名流多所賞仰有訓蒙詩行於世申泉數歲通九經兼試春秋中神童科

劉溥字德廣青田人紹興甲戌別院省試第一人中甲科工詞章有志操累遷大宗正丞兼權都官郎姪陟文藻雅麗人所傳誦孫龔俱以年少世其科

陳權字國器青田人舉明經任國學正紹興中遷國子司業時稱鄉達先生致政歸隱壽八十餘  
葉謙亨字伯益青田人以文章藻繪爲士林推重累遷



起居舍人兼權中書除知撫州終浙西提點刑獄所  
至有聲有文集五卷外制二卷奏議一卷子高以世  
賞厯知靖州終朝散大夫

余經國字朝綱青田人仕終撫州推官德望隆重鄉人  
從游者衆稱為鄉先生

鄭克巳字仁叔青田人登淳熙進士性清逸有晉宋人  
風範詩自成一家嘗有句云自是隆興新體制元非  
大厯舊詞章官至福建提刑司幹官

朱筠字仲端青田人甫冠以詞賦魁鄉薦繼游上庠中  
特奏名第二人湯歧公一見奇之命子碩受業內翰

李獻時亦從游除蘄春監尋卒有竹軒少集

蕭暉字君實青田人幼穎異六歲能屬文未冠以禮經  
舉入太學有聲試春官占首選登紹興元年進士分  
教臨江以大學絜矩中庸伐柯章揭示學者知用力  
之地尋除文思院

洪師中青田人少好讀書以承家學師事余學古樂恬  
淡足跡不入縣門著樂閒集

季致平青田人隱居不仕治詩書易傳會其要領著精  
覽歸一圖解

項文字丹坡青田人咸淳戊辰舉鄉薦春闈不利主司



嘉其文學博瞻留試館職至景炎初掌本縣儒學教

事

葉紹字繼甫青田人有古烈士風以賢良方正聘於朝

初授迪功郎掌永嘉教事居官二十五年士風丕變

德祐間聘修國史日歷時元兵日擾國事不可為紹

義形於詩曰平生報國心安在願作西風掃虜塵後

乞歸見族人有貧不能娶者多捐資贊成之

周啟明字昭回縉雲人景德中舉賢良方正罷歸後舉

進士宋史本紀大中祥符五年賜處州進士周啟明粟帛仁宗朝仕至太常丞

皇朝類苑載啟明贈近臣病愈旬有一九童子藥五

返使臣車楊文公談苑載啟明送皇甫提刑有鳴夷

江上畚田稔牛斗星邊貫索空之句厲鶚宋詩紀事啟明篤

學藏書數千卷多手寫而能口誦之有詩賦雜文千

六百篇一統志宋一統志啟明字昭回其先金陵

良方正既而報罷歸教弟子百餘人不復有仕進意

里人稱為處士轉運使陳堯佐表其行義於朝賜東

帛仁宗時除助教選至太常丞不言為縉雲人今據

宋詩紀事補案周啟明舊志作龍泉人縉志作縉

雲人茲從縉志

詹駉字存中縉雲人大中祥符元年舉進士第一真宗

書榮桂字賜之時年二十二官至大中大夫翰林學

士致仕



陶禧珍縉雲人性資通睿詞翰宏博熙甯中應求賢詔仕至徵仕郎史館編修

胡份縉雲人文章氣節為學者宗官至國子司業後守鄱陽有詩集行於世江西汪藻為序

楊光祖縉雲人崇甯中知歙州黟縣善文詞

胡權字經仲縉雲人紹興十八年進士調崇安尉歙縣丞官太常簿權通經有學識教授鄉里遊其門者多至顯仕

鮑彪字文虎縉雲人精史學以戰國策書失次為之註定時有論說以正其謬又有書解杜詩註為司封員

外請老賦詩曰此身甘作老林泉縉紳高之案鮑彪今本國策亦題縉雲鮑彪註舊志此作龍泉人於明

萬歷間復有鮑彪傳作縉雲人所書與此畧同係一人兩傳今為訂正

羊承德縉雲人師呂成公祖謙著春秋發微由進士終奉議郎徽州通判子哲師呂成公子伯愚學問該博才思深遠所著有指南集

李桂字芳叔縉雲人調饒杭二州教授為文自出機軸從學數百人多成名士識度偉卓議論慷慨作詩有

晚唐風致

趙資道縉雲人海州教授直秘閣知台州文學優長為



郡有聲

楊勳字舜仁縉雲人博學工文嘉定中兩試潛舉終海州教授

張少微縉雲人與弟少循俱以文學著相繼貢上庠馳譽京師後皆不仕

劉澹然字安道松陽人博極羣書嘉泰壬戌進士歷官至秘書省著作郎初安道爲舉子游三衢試士以風雲龍虎之賦魁於衆作郡守史相奇其才而館穀之邑人項安世徙江陵其子容孫以浙東憲使行縣展墓安道以啟致之曰立春繡於霄漢之上孰不慕公

子之威名耀畫錦於井落之間我但羨長卿之風度又曰千萬世之人物山川盡收入吏部精神之表八十歲之鄉鄰父老尙能誦平翁卅角之詩其俊逸如此著有午溪集

華岳字元鎮遂昌人由特奏名官至台州刑曹元祐間令張根興學校延岳爲師教道諸生趙顥鄭遼皆其高弟

鄭侏字端夫遂昌人少以學問稱居鄉教授從者如雲紹興間登第分教盱眙縣改茶陵簿秩滿引年賜五品服歸張貴謨華延年皆其門人



龔敦頤遂昌人原之孫博通羣書撰元祐建中列傳譜述一百卷淳熙間修國史洪邁請加甄錄授潁州文學仕至宗正丞

王鉞字介翁遂昌人由選舉授金溪尉帝昺播遷卽棄官歸隱與尹綠坡葉柘山諸人結社賦詩匾所居曰月洞後族孫王養端爲之序

葉濤字致遠龍泉人熙甯進士以文章見褒於神宗仕至翰苑以徽猷閣待制致仕徙居白下與王蘇相友倡和甚富

管師常龍泉人與兄師復俱從胡安定學有盛名熙甯

元年上祀南郊詔舉逸民部刺史以師常應詔越三年召試舍人院賜進士第授校書郎知江陵府監利縣事時方以苗役新書從政州縣上下以趨辦畢給赴功救過爲職業師常獨置得失與察訪使抗論可否人爲師常殆之然恪意在是人亦輒亮意使善立道出安州之應城少息僧廬忽一朝瞑眩問其子希旦日早晚日午矣起攝衣冠需紙筆曰吾年四十九四大不可守寄語同道人日輪射牛斗徐置筆就枕遂逝初居白雲巖自號白雲翁有集行於世

葉膺字遷善龍泉人幼知力學算法尤精登熙甯進士



大觀初詔天下明算學膺應試除算學博士轉鴻臚丞

鮑慎繇字欽止龍泉人少侍父光祿官湖外時何琬在長沙宴文士慎繇賦畫舫詩立就且警張舜民輩皆驚曰此郎他日必以文藝顯後登元祐進士召對上曰見卿何晚耶除工部員外郎歷司勳考功內外所至有聲坐黨禁流落註杜詩又著夷白堂集神宗常御札飛白書夷白堂三大字賜之

葉紹翁南宋時龍泉人著四朝聞見錄分甲乙丙丁戊五集載高孝光甯四朝時政朝野瑣事及慶元黨禁

始末甚為詳贍足補史傳之缺其所歷官階別無序傳可攷集中載真文忠言論是與文忠同在朝列而執後進禮者竝載幼時入浦城鄉校見芝草二本文忠真公遂登乙科繼中宏博其婦翁楊圭亦同年第文忠官至腰金楊公亦至佩金又丙集載其先為光州固始人徙居建之浦城今卷首自署龍泉人蓋由浦城遷龍泉耳

陳垓字漫翁龍泉人開禧進士從水心先生游為文高古仕至泰州兼淮東提學

元



王淮字玉淵麗水人博學美容儀嘗受業於石塘胡先

生大德間授瀏陽州教授歷松江路判官

陳繹曾麗水人為人口吃而精敏異常諸經註疏多能

記誦文詞汪洋浩博其氣蔚如論者謂與莆田陳旋

相伯仲官至國子助教

吳仲元麗水人文學能世其家後為本路儒學教授

王元泰字長卿麗水人明易經訓導郡庠子仲成獨峯

書院山長姪景行通春秋經訓導郡庠

劉演字浩卿麗水人有文學美容儀受經於錄事玉山

鄭明善最得其傳至正初起為義烏教諭後署明善

書院山長子彬洪武初工部員外郎

林森字君度麗水人博學老成為後進模範不樂仕進

年九十餘卒

葉登龍字梅林麗水人博學明經講道授徒著周易記

梁載字遜耕麗水人通經博學著元處州路志姪琪完

珪以文學世其家

陳康子字景邵麗水人著通鑑節要刊於郡庠

葉挺號高溪麗水人善詩章有和陶集

葉復字仲明麗水人麗志作葉俊通經學著石山樵唱詩集

陳鑑字伯銖麗水人典教松陽善詩章著午溪集



任維平麗水人博究羣書至正己亥明師下金華同弟  
維信往見太祖方御食命賦青瓷壺維平卽對曰貯  
酒盛漿小類瓶曾迎湯武救民兵若教假入神仙手  
捧出中天日月明太祖大悅留語達旦俱授義兵萬  
戶維平辭不就後以所言皆驗再召封觀察使

劉宗保麗水人博學能文篤守儒行元任青田縣石門  
書院山長洪武初任本府儒學訓導

楊和字仁敬青田人由明經授處州路學錄因歲歉賑  
粟惠民事聞轉國學教諭有壁水集行世

郭良知號稼圃縉雲人麗志作麗水人博學通經文章道德爲

### 時儒宗

范霖字君澤縉雲人學問該博詞藻清雅嘗被召入獻  
元封圖歷代編年圖授翰林編修出爲江浙儒學提  
舉官至禮部侍郎

樊萬字萬里縉雲人嘗執經金華王柏之門元初爲滁  
州教授入爲應奉翰林文字終浙江儒學提舉

施子正字伯高縉雲人沉重典雅言行可法至元中任  
開化書院山長遷金華縣儒學教諭

何人傑縉雲人鈞臺書院山長子承祖字叔通力學不  
倦薦初菴書院山長



羅忠字貞卿縉雲人素博學能文任鄱陽簿

朱填字定甫縉雲人從金華聞人柳道傳金陵鄭復初

青田葉見山游爲本縣儒學訓導

周仲瑜松陽人父此山先生館職不受仲瑜承家學益

肆力乃以辟授稼軒書院山長改紫陽書院

練進字長卿松陽人少博學通春秋尤精於律至正初

詔入翰林終登仕郎大司農豐潤署丞

鄭元祐字明德遂昌人天姿穎悟十五能詩賦與平章

廉公爲忘年友父卒徙居姑蘇從學者衆省臺宣闕

憲府交薦至正十七年授平江路儒學教授陞浙江

提舉所著有遂昌山人雜錄弁山居文集祀於學

楊載字仲宏龍泉人精於詩學時與虞伯生揭傒斯范

得機等齊名而楊尤稱獨步晚徙居浦城

項壘字彥高龍泉人博學能文尤長於詩石抹宜孫劉

伯溫葉世傑輩皆相推重前後續集詩凡八卷題曰

山中言志

明

趙可久麗水人修身博學履道能文洪武初由進士舉

任廣東左布政使

潘初麗水人以明經授本府慶元縣儒學訓導號金軒



皮州府志 卷之二十一  
有雉足稿

潘伯濟麗水人有學行美丰儀明初以明經秀才歷監察御史陞河南按察僉事有巢雲集三十卷

黃池字伯生麗水人文章器識允爲時重官秦府紀善多著述有石樓文集師事劉伯溫先生

祝金字廷心麗水人性資純厚志學不倦師事宋景濂由儒士任本府訓陞浦江諭屢典鄉試文衡所著有吟癡集祀本縣名宦

徐用中麗水人嗜學工詩由秀才授遼府教授訓課生徒多有成立

吳廷桓麗水人洪武中舉明經任王府紀善有百韻梅花詩詠史詩槐溪吟稿著於時

潘華麗水人由舉人永樂四年預修大典七年中乙榜授直隸臨淮學諭十年奉勅入禮經館纂修書成歷任長汀南昌鎮江上饒諸學

吳允傳麗水人永樂六年被召預修大典授順天府灤縣主簿致政歸自號枯山遺老有灤陰吟稿

裘仁字天爵處州衛人中宏治己酉鄉試任北京都察院都事嚴毅端方言笑不苟居常授徒克敦師道括郡名士多出其門諸生侍立不敢傾側有程門立雪



風孝養二親備極恭順每逢母怒卽夫婦齊跪席前  
必得歡心方起居官正直不阿權貴致政家居不履  
公庭於時監司必先往訪待以上賓之禮持身以禮  
見得思義至老不衰

葉炷字季鼎麗水人年逾弱冠始習舉業博洽經史門  
壁皆書格言後以貢任淮安經歷陞知豐縣生平著  
作甚富尤工詩畫別墅在椒山沿流倚山逶迤如桃  
源人謂不減輞川年八十七所著有遵制錄椒山文  
集

項泓字德容麗水人由歲貢任德興縣訓年二十七始

發憤讀書志堅質魯跪以自警每對月默誦史鑑以  
明經稱凡授業者俱底於成士林重之卒年八十七  
何燾字思仁麗水人少聰睿父格教導甚嚴燾毅然以  
聖賢自待雖習舉子業洞究性命不爲捷徑計督學  
萬公選入萬松書院以鄉薦授新喻教諭聘主湖廣  
鄉試號稱得人令信豐以寬仁爲理民常見思所著  
有四書集義春秋主意效顰紀舒嘯東臯篇滄螺錄  
青桂軒集

葉曾字一之麗水人性孝友父病祈神自代喪母啟穴  
有紫茜人以爲瑞文名藉甚負笈游吳下名公多器



之郡司理吳江顧公太守宛陵任公延訓子弟兩與  
乙榜以歲薦首廷試司訓宣城薦擢順義令再擢莒  
州守致政歸著有梅下餘言八卷年七十六祀鄉賢  
楊瑞字汝賢處州衛人少聰穎甫弱冠博通經史爲督  
學徐文貞公首拔五雲施侍御延訓二子先後成進  
士以歲薦入成均爲大司成趙大洲公所鑒拔謁選  
羅源令歲大祲發粟煮粥賑飢存活者衆在任六年  
賢聲茂著以忤當道量移潯州府判遂拂衣歸於菱  
山麓構凌翠樓草元亭課子讀書長子大儒字希魯  
寄籍龍泉因入龍庠次子大倫髫年入麗庠並爲督

學林警庸公所鑒賞勤學不問家人產一時咸推重  
之

葉志淑字子善麗水人家貧力學不妄交游精三禮貢  
入成均萬曆壬午中順天鄉試署靜海論陞虹縣令  
以忤當道致政歸怡情吟詠郡守宣城許公聘修郡  
志

胡廷賓字用予麗水人幼負大志父功懋衛揮使以遠  
大期之年十六補諸生負笈西湖遊具區馮太史門  
爲諸名公所賞郡守漳南鄭公邑令進賢樊君深器  
焉丙午以尙書魁浙闈屢蹶春官志益銳事母孝敬



不蓄私財兩娶妻奩貲盡供菽水讓勲秩於弟廷相亦中武科歷官都閫叔季入泮多所訓迪痛父早逝以陟岵名軒登乙榜竟賫志以歿

何應乾字孟陽麗水人鏗長子天性穎悟與弟應春應文以文行相勗弱冠入庠試輒冠軍以貢授甯海訓薦擢荔浦令未朞月解綬歸構悠然堂與朋輩觴詠自娛藏書甚富人有別集必借錄之年七十八應春字仲仁博洽風雅工書法詩學陶韋以餘力究心方脉親友有疾得一七卽瘥應文字季明亦以文行爲陸鍾符祝石林諸公所重

吳文榮字汝仁麗水人沈潛嗜學弱冠餽於庠文聲藉甚以歲貢中北園乙榜任撫州訓又中江西乙榜甫登薦剡而卒

吳應期字世昌麗水人得先達南山鄭公尙書之傳篤志潛修與弟應斗相師友載籍極博剔秘搜菁無不暢曉如洪鐘待扣門下士成就極多以貢授涪安訓遷容縣諭未任卒

陳萬言麗水人少英敏博綜經史尤長詩賦郡士大夫多敬重之以歲薦未官而卒

李應春字次白麗水人郡廩生淹博羣書受業問奇者



甚衆善屬古文詩詞爲當道所敬朱郡侯請修郡誌以將貢年卒

麻一琴字和齋麗水人穎悟博學試輒冠軍著有四書正說易經解訓行世課子文憲明經出仕

辜存表字元表麗水人博極羣書教授生徒四方名士皆出其門經史手自評註尤長於詩所著有甌廬草蓮甌子等集

張漢傑字希房處州衛人自幼穎異遵寡母訓讀書白雲山寺嘗袖攜蔬米欣然入山生平不道人短登丁卯鄉書四上公車以弗獲一第悅親心爲憾家無贏

餘好聚書精易理子嵩生歲薦

王潤孫青田人德性溫重士林仰望文章詩律風韻蕭然明初知縣耿亮薦任本學教諭作興學賦通五經尤長於易有圖解集

厲光字仲潛青田人潛心古道經史百家靡不淹貫洪武初宋濂薦任本縣教諭訓諸生實學不徒文藝相高著潛居集

戴夢齡青田人岐嶷穎悟七歲爲文操筆立就一日先輩謂之曰項羽聞楚歌賦作者多不工童子能之乎夢齡唯唯移時草就坐客驚駭曰此奇才也有司將



聞於朝其父固辭乃止未冠而卒人名其所居之山為神童峯

蔣謚字則言青田人

青志作葉謚

自少岐嶷穎敏以孝謹聞

博瞻能詩著慰思集

洪繩字文綱青田人少穎慧師事陳會元詔宣德乙卯魁書經正統壬戌成進士官比部持已清慎讞獄詳明因註誤謫戍遼陽越八年調龍門天順改元得赦將次叙用疏乞南還同郡趙璉作賦贈之  
留季安青田人由明經初任新甯伯校書選入文淵閣纂修四書五經性理大全書成授鎮江府學訓導

蔣嘏青田人博涉羣書以孝友稱著仁溪樵唱四卷行世

王順序字鴻翔青田人蚤有才名與麗水張敦復遂昌朱應鐘黃中並受知郡守毗陵吳公有遊南明記弱冠選貢任粵西遷江令有能聲

包瑜字希賢青田人由舉人任教諭致仕歸淮王幣聘修書進講便殿賜坐所著通鑑事類一百二十一卷左傳事類四十卷王閱之甚喜遂梓行仍命工肖瑜像親為讚曰見道之真履道之正咳唾古今寤寐賢聖傳獵經蒐回瓢點詠衣冠肅如後學企敬居七年



告老歸

葉愚字宏明青田人工詩文喜論世務歲貢春官作諫  
草六事一曰去壬人二曰除佛法三曰興土木四曰  
好神仙五曰早朝六曰邊務將上於朝執政者以爲  
出位賈禍寢不奏授武定訓導所著有存如集

陳偕字世和青田人天性孝友博洽詩文自天台司訓  
歷教諭學正教授十有五年囊橐蕭然在建昌益王  
重其文學加禮焉著道教源流古今政本天台紀勝  
等書祀瀘溪名宦

林應璧字尙輝青田人八歲善記誦大母傷左足扶持  
不離昕夕精舉子業典雅不羣以歲薦入京廷試歸  
抵揚州遭疾卒

張本洛青田人幼承父訓館於太鶴洞師事半野范先  
生於義利之辨甚晰弱冠入泮養母敬兄輕財篤故  
數薦賓筵年七十三卒

劉世學字少白青田人文成公十一世孫力學敦行善  
吟咏精翰墨自青徙毗陵母沒盧墓茹素終身爲白  
下諸名公所重寓京邸三十餘年講學論道縉紳多  
折節下之

王用臣字羅南青田人蘊藉宏深工詩賦自經史及星



緯經野鐘律象數諸家罔不鉤索居家孝事繼母以  
明經訓浦江有月泉晦菴東萊講學處集士結社葺  
文昌祠陞象山諭轉南安郡博歸作寶穀詩勸農戒  
著有懺庵一集二集三集明志錄行世

葉守暢字毓寰青田人自祖父師范半野之學半野爲  
陽明先生高弟洞徹奧旨至暢益著以明經司訓仙  
居台李蔣公鳴玉敬重之咨治論文撰潛心理學卷  
爲贈歸里陶淑後賢戶屢常滿

周三錫字士承青田人精於易受業永嘉劉康祉之門  
文名藉甚登萬曆乙卯鄉薦每一藝出後進傳誦授

### 知縣卒

蔣方萼字筆生青田人崇貞末貢孝友讀書能文爲時  
推重郡伯周茂源造廬延訪贈曰三徑高風邑令高  
攀蟾贈曰太邱逸韻

王濤縉雲人博學端行家藏萬卷號墨莊著有愚泉集  
行世

鄭禧縉雲人至孝博學累官信陽知州有惠政祀名宦  
所著有周易本義音釋齊東野語輯畧范文正公年  
表東湖集吟鞭小稿

李邦棟字爾拙縉雲人穎異不羣下筆千言立就與弟



廬州府志 卷之二十一  
三十一  
邦梁邦柱相師友謂青紫如拾芥也未冠入郡庠丁酉選入成均議論超卓爲大司成所器以數奇賚志而歿

李邦梁字紫卿縉雲人瑰瑋曠達類陳同甫讀書鄙章句博洽今古好爲三都兩京之學登歲薦後猶苦心下帷授台州府學訓導以豆腐賦爲督學鄒嘉生先生所賞台人陳函輝素號博物遇梁屈服轉甯州教諭又轉九江府學教授告歸行李蕭然其詩宗李杜字法鍾王所著有積石山房等集大易剖老子元解捕虎奇門

田君有字良臣縉雲人幼習舉子業一試不合遂隱居著書有太極通書說二卷春秋管見三卷性理七篇河圖洛書大衍揲著太元準易說參同契辨律呂天文地理精考諸史類考二十三卷

李珞字朝光縉雲人敦孝友絕紛華淹貫詩書墳典遍游山水必記其勝文辭援筆立就著醒脾鐵鏡月巖偶然錄詩韻音釋續癯老人傳皆有裨世教

李灝字資賢縉雲人補弟子員從游胡僉事門與開化吳景端齊名貢成均邁疾歸琴詩自適生平孝友信義淹博經史百家著有憫志稿行世今仙都雪崖是



其手闢遺蹤也

季允緒字紉紘縉雲人博洽羣書爲文類漢魏所著詩集多長慶體

葉叙字公倫縉雲人性資端謹童州時事永嘉夏清伯麗水葉文範得壁經之旨所著有用拙稿

包文舉字仕登松陽人從王西山先生受尚書得聞性命道德之學應賢人君子聘爲國子助教明祖召入武英殿賜坐陳二帝三王之道稱旨顧謂近臣曰此吉人士也以時訪問數有匡正陞齊府長史潭王以其聞望雅重之高麗國亦聞其名所著有兩菴和陶

壁水海岱等集

周景辰字以行松陽人永樂中學士王景彰薦入文淵閣纂修國史試以鴛鴦菊有漢宮瓦冷夜來霜佳菊凌寒獨弄芳句擢知連城松溪二縣吏民愛之練魯得景辰上元應制詩誦曰此詩壓倒文淵閣矣著有東蒙集

程鵬字叔南松陽人童年列膠庠足跡不躡公庭聚徒講肄舉賓筵益勵清操

徐學禮字仲立松陽人事繼母盡孝友愛兄弟性奇敏爲文每於傳註外出特解師事何賓巖先生丁酉選



貢以研究積勞卒於京邸同年趙無聲歸其喪

葉永華字玉果松陽人登北榜賢書對智勇策幾萬言時與楊重熙王宗熙稱海內三奇司成倪鴻寶拔之異等每與論經國大事著藕孔集讀書日記續河圖衍義諸書

詹加新字象鼎松陽人幼以神童稱年十三餼於庠博極經史胸襟磊落排紛難散千金弗恤因赴貢卒葉芳萼字伯開松陽人處家庭以孝友聞早歲食餼淹貫書史遊其門者甚眾著有西崑集

葉正字書升松陽人好學砥行一介不取以淡泊自甘

俞廣字得濟遂昌人幼孤長好學涉獵既博從先生長者習詩律永樂六年詔翰林集四方儒學士纂修大典廣以能書薦書成被賜賚詔就翰林益進其業十八年擢兵科給事中勤慎詳敏克舉其職坐累出為邯鄲縣丞縣當孔道廣為之有方民不困而事集尤以寬厚得民心洪熙元年轉刑部照磨正德初陞刑部廣西清吏主事獄中無冤滯大學士楊士奇為誌銘按永樂六年與修大典至正德初已九十餘年楊士奇係宣德正統時輔相正德當是正統舊志誤吳紹生遂昌人永樂乙未進士以習詩文考選翰林庶吉士轉行在行人司使琉球陞禮部儀制司員外郎



歷工部屯田司郎中所著有默齋集子亦進士官知府

王養端字汝推遂昌人倜儻負意氣抵掌談古今滔滔如懸河工古文詩逼近唐人舉順天亞魁大學士袁煒每推轂下之與濮州李先芳揚州宗臣諸名公相結甚懽著有震堂集山居論

黃九章字叔範遂昌人學問宏深由貢授龍溪訓華亭諭海州學正南昌教授所至訓士有方尤長於詩文所著有秋水齋集

葉澳字爾瞻遂昌人少時卽負大志知縣黃道瞻一見異之負笈從明師游受知於縣令湯顯祖萬曆甲午領鄉薦所著有四書註翼易通淇筠志感弁詩行於世

黃九鼎字禹鈞遂昌人萬曆癸酉舉於鄉除陝州守多惠政未幾歸愛西湖之勝遂家焉名山異蹟題咏幾遍尤善於樂府擬古諸體督撫劉公一焜尊爲人倫楷模捐俸梓湖山百咏七二草行於世

徐應乾字以清遂昌人行誼端謹學問淵深家貧課徒以束贄奉父兄夙著才名由恩貢授甯波訓清遠諭雷州府授董修府志著有昌巖藏稿士林正鵠



包志伊字惟任遂昌人髫年游泮倜儻負大志自舉業外經史諸子一目成誦爲詩歌古文娓娓數千言邑令湯顯祖器之讀書唐山無疾而終或傳其爲此山神邑人肖像祀之

鄭補字國補遂昌人鄉賢鄭還之子幼得家傳長崇正學稟性至孝父疾籲天祈代執喪哀毀廬墓邑令池浴德爲撰像贊所著有學庸衍義等篇而綱目管義一書尤大有補於尹氏發明云

鄭秉鍊遂昌人以歲薦授蕪湖丞日與諸生爲文社免歸囊橐蕭然讀書彈琴修家族雍睦之政一時名公

如焦漪園楊崑阜皆雅重之

童進思字懋忠遂昌人弱冠遊庠九試棘闈不售志益壯一時名士皆出其門善吟咏有溪上吟童子離騷王文中字紹全遂昌歲貢性孝友讀易精陰陽妙解游其門者歲常滿閉戶好學不履公庭年八十五卒

徐應泮字鵬池遂昌人弱冠游庠性至孝及親亡行文公家禮文宗樊公重之生平著作多法古人

宋明誠字聚敬遂昌人性孝友工詩文操行耿介嶷然嶽峙樂道安貧有陳太邱風卒年九十

吳孔雍字堯卿遂昌人由歲薦任天台訓導性孝友輕



財睦族力行古道投徒於郡弟子甚衆好元理工大書屢辟賓筵所著有振世希聲稿門人中丞項應祥太史楊守勤同鄉王一中爲之序

葉繼康字伯阜遂昌人孝友性成讀書一目數行經史子集稗官小說靡不淹貫萬曆癸卯中浙闈副榜以貢授鄞縣訓陞昌化諭致仕歸屢膺大賓席無疾終年七十五

童問禮字用和遂昌人年十三遊庠屢赴棘闈師範尊嚴出其門者多名士子任良任重任大皆諸生

鄭秉券字錫卿遂昌人髫年入郡庠太守張公器之因贅於麗以毛詩教授門徒監司守倅多延爲子弟師以貢訓開化轉分水諭卒於任

包萬有字似之遂昌人性孝六歲喪父事繼母如所生居喪哀毀骨立弱冠遊庠天啟丁卯主司命題媚逆璫投筆而出棄青衿放浪山水博極羣書建兌谷書院朔望講經史聘修郡邑志所著有編年合錄五經同異史編餘言及範數贊辭小學遺書講學劄記食貧錄等書祀鄉賢

季仁壽字山甫龍泉人元末用薦者起教諭慈谿徵逋租新禮殿祀黃公震於學宮遷松陽教諭郡守請定



鄉飲酒禮斟酌古今定為儀注陞雙溪山長轉婺州  
 教授不赴放意物外治易詩書春秋學者稱為四經  
 先生著有春谷讀書記易詩書春秋四書衍義四書  
 質義策樞通覽詩林鈞元弓冶錄遭兵燹鮮存春谷  
 集行於世按麗志作麗水人云從朱景濂季公墓銘考定此從舊志作龍泉人  
 鮑渾字迪中龍泉人洪武中由監生授兩淮鹽運使清  
 節自甘喜天文術數之學尤深於易理解任歸優游  
 山水不知所終

張克靜龍泉人簡重寡言留心經史弱冠中第任江西  
 奉新教諭

陳圭字思復龍泉人自少好學不憚寒暑每夜讀必繫  
 髮於梁效古人警枕之意後由進士任工部主事  
 周縮字見山龍泉人體偉學博以歲薦任永州府判學  
 行見賞於當道委以查盤所至見德屢膺薦劾告休  
 歸里歌咏自如年八十終  
 季大侃字震元龍泉人年十七游泮以歲薦入成均為  
 大司成所鑒取嬰疾而歿  
 季敬臣字景竹龍泉人聰穎博雅試屢高等能詩工畫  
 琴書一室吟咏自如以貢任定邊令著有纈璘館招  
 劍篇此君愛助篇藏於家



周立身字名卿龍泉人幼穎異讀書無間寒暑天啟初  
選入北雍兩舉不售考縣職未任而終

葉瑗字仲美慶元人穎悟力學十三歲卽蜚聲邑庠及  
長試棘闈以制額限遂歸不復赴與其徒談道自樂  
年七十以壽終

吳慶會字泰遇慶元人少穎異十六廩於庠十九膺萬  
厯丁酉選貢英資濬發筆力邁勁入北雍爲名流所  
推三試北闈不第謁選授廣西平南令再補湖廣漢  
陽英明果斷有政聲以骯髒左遷藩理歸所著有四  
書義及巖居詩鈔藏於家

陳孟素景甯人性姿清逸雅嗜吟咏僉憲陳建公高其  
行嘗贈以詩自號訥翁有詩集藏於家

潘辰景甯人由薦舉官太常少卿學術純正妙契性理  
爲文追配秦漢直內閣二十七年誥勅多出其手士  
大夫翕然稱之以賢勞卒特賜葬祭內閣楊石齋誌  
其墓謂與吳康齊異跡同道著有南屏遺稿父潘流  
清博學工文未析景甯縣時中正統辛酉青田學舉  
人曾上車駕幸太學賦深爲大司成李時勉所重

潘援景甯人舉人優於詩文侍御西蜀李公稱其已到  
化處憲副沈暎嘗曰先生詩文宜於兩漢間求之兩



聘文衡公明服人陞翰林簡討授中書舍人有持身清慎蒞事精詳之褒所著有東厓摘稿詩林辨體

國朝

錢金生字秋水麗水人幼孤而貧母楊氏紡績佐讀崇

貞十二年以春秋登鄉薦順治中授嘉善教諭弟子

稱白鹿先生歷遷陵水會甯令多善政卒於官

錢湛字公露麗水人金生子讀書晦明弗輟六經諸子

無所不通康熙三十二年舉於鄉任蘭谿教諭

辜景臯字愷六麗水人才識通達著作甚富知府劉廷

璣極賞之以拔貢終

陳大受字子宏麗水人拔貢博極羣書詩文援筆立就

累試不售晚歲築樓曰問天藏其生平著述以寄慨

楊金生字協恭麗水人篤學好古詩文皆醇雅教授生

徒曷以實行不僅爲詞章以明經終

葉應鸞字漢翔麗水人賦性簡靜文詞淵雅以貢授仁

和訓導未赴而卒

吳奇珍字樸初麗水人順治八年舉人授歸安教諭士

論翕然分校南闈常熟蔣廷錫出其門

何棟字韡堂麗水人由烏程訓導陞龍游教諭在職以

清操著致仕年八十餘力學無倦容嘗取先儒易主



旡咎旡咎在補過之說繪讀易圖以自勵

戴金垣字爾庚麗水人工經藝時學使諸城竇光胤嚴於持論特賞金垣文刻行之嘗判股療母疾人稱戴孝子弟金南字赤寶好聚碑刻善別古器以書法名金南子琛工吟咏著有雞肋詩草

王經根字培六麗水人廩貢生隨父維球鶴峯任方伯周公聘掌書記奇其才入覲挈以赴都遇特科考列二等授縣丞分發安徽歷署靈壁諸縣有惠政

錢錕麗水歲貢學問淹博孤潔有隱操父爲戶部郎錕隨侍父歿扶櫬歸杜門却掃不干世譽服闋觀察某

公贈以金勸赴秋闈謝却之錢唐許氏錕母家也貴顯冠一時屢書招致不報授徒里中嘗曰制藝雖小道然非熟讀經史則胸襟鄙淺豈能代聖賢立言哉總兵梁勝瀨聞其賢往謁之不見餽之亦不受歎息而去卒年七十二學者稱蘭坡先生

徐望璋字達珍麗水人幼穎敏讀書日千言長益嗜學家貧無力購書館於碧湖湯氏湯故多書雪抄露纂無虛晷詩古文詞皆入古人室嘉慶辛酉拔貢丙子舉於鄉主講蓮城十餘年出其門者皆有師範授武義教論潔已愛士武人士至今誦之以足疾告歸年



七十餘矣嘗誦明人學道終身只學貧句語門人曰貧豈待學學者乃能貧耳卒年八十二著有芸亭詩鈔

王尚賡字雲舫麗水諸生性孤高平居以圖史自娛善書畫癖嗜斷碣殘碑剔苔蘚摹之纂續栝蒼金石志四卷麗邑向無志賡獨留心採訪鈔錄甚夥道光二十六年修麗志皆其力也卒年五十有八

徐紹典字繼虞麗水歲貢讀書務求根柢負笈錢唐師事周芾堂先生講明身心性命之理學益粹省試屢薦不售意豁如也獎誘後進常若不及卒年六十三

葉雲蛟字乘風麗水歲貢攻苦力學赴秋闈十餘次有誚讓之者不稍阻咸豐十一年避亂山鄉一日沐浴整衣冠屬家人以後事人皆嘻笑之語畢瞑目而逝何雲煒字映舟麗水歲貢悃悃無華質魯而好學至老猶能背誦五經著有集經句避難文數篇

魏廷亮字惟時麗水人沉靜好學每試優等道光己酉拔貢朝考取而復屏人爲惋惜亮豁如也知縣陶鴻勳薦舉孝廉方正不就教授里中雀鼠之爭咸爲解釋人亦得其一言以爲重著遭難錄二卷

王允景字輝陽青田人順治歲貢任江山訓導讀書晦



明勿輟贍博能文家貧藏書累篋邑里奉爲典型順治乙未續修郡志出其手輯後卒於官

伍鶴齡青田庠生掉鞅文壇數十年屢躡棘闈至老著述不衰

徐上成字文若青田人順治丁酉舉人七上公車不第閩寇陷青田迫投僞職不受丙寅修邑志戊辰補湖州教授始至以治心八詠示及門大旨主於存誠退欲門人陳賁等爲之注已卯閩省聘爲鄉試同考官稱得士後卒於官所著有鶴阿集居山集茗署草閩遊草

陳開基字史瞻青田優貢任永嘉訓導宋進士葵之後代有隱德大父與鄰有隙鄰覓水以炊有毒虺斃溪上爲決筭棄虺鄰人得無恙父正以孝聞開基幼穎異下筆學舉子業卽工時文體靡曼基矯以清折逼近艾園樸山嘗與韓觀察錫胙同學論者以韓陳並稱韓宦遊四方而基教授里門學徒尤尊仰之弟應昌選貢子惇副貢同時陳文豹字蔚山由選貢中副車司天台訓父有綱字子振歲貢皆績學工文有聲於時

朱廉字价人青田人家雄於貲廉獨刻苦治學天台秦



錫醕負文章重名廉與弟廩往受業初邑人士鮮治  
詞賦及廉從秦學上泝騷選下沿徐庾旁及諸家駢  
儷之作蔚然可觀弟元標元英歲貢廩乾隆乙酉選  
貢皆工文

杜應思字銘九青田人勵志向學受業同里徐敦紀門  
深見器許遊學杭州三年業大進汪文端公杜文正  
公先後按處甄其文於行卷中稱歎不容口十一試  
皆冠其曹卒以諸生終敦紀字肅人歲貢學行優長  
爲時名宿

孫經邦字式中青田人歲貢尙悌子家貧好學書過目

輒曉大義弱冠文名藉甚登拔萃科投徒里中執贄  
門下者皆得其材從姪維璣以拔貢任通渭石埭知  
縣子三維璜維球均廩生有文名維鬯中道光辛卯  
副榜篤學不倦博覽羣籍學者尤尊仰之鬯子鳳咸  
豐辛酉拔貢署湖州教授

端木百祿字叔總青田人國瑚子也道光巳酉拔貢注  
選直隸州州判幼承家學治易好爲詩尤嗜金石文  
字卒年三十七著有石門山房詩鈔

陳澄心字如淵縉雲人天資英敏學識過人曹厚庵序  
其詩文以陳同甫擬之由選貢授曹縣令政治有聲



解綬歸營天藻堂以泉石花竹自娛著有瘦鐵吟非  
白樓草史參八十篇

麻成璋字赤瑜縉雲人穎異絕倫詩文萬言立就尤善  
琴中丁酉舉人

李期昌字當時縉雲人博洽經史善詩詞精書法以貢  
授岐山縣卒於官

李以雅字不匱縉雲人明貞肅公李鈺孫也以官蔭五  
軍都督府都事念母孀居甘養不仕生平淹貫經史  
邑令霍延修邑志卒年八十六著有雲敷堂集

朱煥字曰旦縉雲歲貢生而穎異應試九冠諸軍周清

源先生試栝蒼作龍淵賦大加稱賞以數奇卒老場  
屋嘗參修邑志及仙居縣志著大治集鏡心錄史論  
縉雲名山志栝蒼山志詩學參機海宇奇觀等稿又  
善畫梅得梅補之筆意著梅花鼓吹

李鴻模字範思縉雲人日誦數千言爲文援筆立就以  
選貢至京廖邁山黃崑圃汪荇洲諸公皆重其文弟  
鴻樞亦沉潛嗜學時稱二難由歲貢司錢塘學訓

樊京元字鳴幾縉雲諸生好讀書有文名嘗參修邑志  
晚與邑中陳子美李以雅等作逸老會所著有西塾  
集



處州府志 卷之二十一  
李綏祺字介若縉雲人八歲能文弱冠從岳翁朱懷袞  
遊宦嶺南師事西泠沈甸華先生析疑解難有文名  
以歲貢終生平敦孝行親疾衣不解帶免喪踰年祭  
祀必涕泣有青芝山房集

丁叔舟字濟魯縉雲拔貢母亡絕意進取掌教五雲書  
院二十餘年所著有四書輯要錦川時藝篠齋續集  
應文鴻字達若縉雲人颯爽端凝淹貫經史善詩工書  
作文援筆立就以明經終有龍溪雜咏守拙齋稿  
潘朝清字成淦縉雲人幼失怙奉母針氏以孝聞博通  
經史作文獨闢理奧力矯時趨著有迴瀾文集

呂鴻字奠安縉雲恩貢學問純粹詩才敏捷知縣劉廷  
颺書德馨二字式其廬又贈以詩有蒼山好水伊人  
在遙挹光儀照席珍句著有讀書錄詩文集

李用勤字一公縉雲人績學敦行順治甲午舉人時中  
式旗竿例取里甲值歲歉用勤再三郤之任建德教  
諭崇尚經學振興人才有蘇湖遺風著有端居集客  
星集

吳廷榮字國耀縉雲人九歲通五經十二能文章下筆  
有韓蘇意父省三好幽靜任以家政遂棄舉業以明  
經終愛讀史有仿古詠史集離垢軒吟稿



劉祖河字左川縉雲人郡廩生生平以學在大全問在  
近思根柢惟經華藻惟選自勉學使陳碩士奇其文  
謂有國初風範所著仙都八詠寸草心八卷  
王錫昭字彤三縉雲人貢生性情淡不喜治生嗜飲能  
文爲督學劉金門所稱賞

呂佐周字璜溪縉雲人質敏好學貫串六經童試時用  
成語如己出郡伯涂邑令方教諭程特賞之食餼後  
益攻苦自勵鄉闈四薦不售以明經終  
應朝璽號璞齋縉雲人貢生家貧苦學與弟泰來相師  
友時稱二難授徒發明章句或問大全相表裏文宗

國初諸老汪文端公目爲國士己亥秋闈扁舟獨游  
不知所終弟泰來姿尤卓犖爲文深入大家亦游京  
師不返

沈之蓮縉雲諸生父啟玉自婺東徙縉家故貧嘗還人  
遺金百兩蓮幼失怙甫成童奉母遺命以耕兼讀歲  
歉不能自存兄元友元淑掖成之學益進而運蹇時  
誦老當益壯窮且益堅以自勵舌耕三十載年七十  
終

周家相字雨南縉雲歲貢家貧牧牛成童從田肇庭遊  
夜燈無膏臥友榻聽讀悉能記憶初作吾不如老農



題承云農之子恒爲農師疑試以他題立就未冠人  
泮著有嵩山集嘉慶癸酉 恩榜舉人

施霖字傅堃縉雲人少孤嗜學博涉書史試輒冠軍學  
使汪文端公廷珍極加稱賞梓有試藝一帙主講五  
雲恆以經術相勗以明經終

朱邦彥號桂林縉雲人性樸厚寡言笑嘗師事沈鹿鳴  
先生年八十猶力學不倦日誦六經三千言目明如  
少年能於燈下作牛毛書嘉慶癸酉以明經得 恩  
榜舉人

趙以泰縉雲增廣生志氣豪爽家貧好學教諭程子質

深契之爲文融貫經史百家以名家爲範兼長詩古  
詞賦晚著讀詩悱若干卷

潘震川號錦溪縉雲歲貢才識超雋嗜學不厭壬辰歲  
大禮邑令張惟孝命設廠賑饑多所全活設教家塾  
六十年造就者甚衆卒年八十五著有瑞槐課藝澤

### 山雜詠

盧松字子茂縉雲人少敏慧過目成誦以拔貢得學博  
久不選益肆力於天文地理九經百家著有晚成解  
多男說爲世傳誦

趙維英縉雲貢生主金蓮講席二十餘年學者稱雲樵



先生工駢體尤長於詩著友鶴山房試帖并雜咏尹  
余二廣文序而梓之年八旬疾亟猶口占韻語示子  
孫作家訓

李有光號瀾川縉雲人弱齡嗜學經傳諸書手鈔成帙  
造就弟子四十餘年力矯時趨知縣張惟孝煮粥賑  
饑光襄贊其事以廩膳終

朱大文縉雲廩生潛心嗜學天文鈴畧靡不研究名其  
齋曰惜分陰題程課簿曰雪泥印爪著有方輿考四  
十卷圖八卷手錄藏於家咸豐戊午母避寇南鄉文  
往省中途遇害年三十一

朱國珍字昆圃縉雲人性孝友嗜學論解經史必抉奧  
旨文藝華瞻以明經隱居教授年幾七旬手不釋卷  
著周禮注數卷二十四孝詩一卷

丁曰昌字寔明松陽人明經博洽羣書與人交周摯有  
禮修文廟建尊經閣不敢憚勞齒漸高藝圃植花卉  
延老友酣嘯自適或勸之仕輒云五斗米豈易我嶺  
上白雲也壽七十二卒子皆遊庠

劉邁英字卓侯松陽廩生讀書手不釋卷博涉經籍著  
易經解義詩文雄健有奇氣邑令劉贈詩獎之

丁正中字上卿松陽人善屬文尤工於詩貢太學文名



藉甚授山東嶧縣丞辭不赴種竹蒔花與諸文士詩酒盤桓著素園詩集年至八十六

葉鼇字魁英松陽人由歲貢選訓導博學多才以詩酒自娛所教率多俊彥

吳國政字文石松陽恩貢候選教諭掌教明善書院十餘年歷任邑令皆重其品有某爲人所訟餽遺以私之冀一言以伸已國政力却之讀書有根抵年雖老手不釋卷

楊友桐字鳳棲松陽歲貢天資聰穎幼卽能文年十四入邑庠試輒高等尤工於詩所至多題咏子六人設

家塾自課之

許萬青字穎選松陽貢生髫年嗜學性耽清雅築綠水園與諸文人飲酒賦詩蒔花種竹外不干外事

程奇峯字幹侯松陽人幼失怙家貧母徐氏教令讀書弱冠遊庠食餼充乾隆戊辰歲貢授徒家塾先器識而後文藝松邑名士半出其門年九十終

包旭元字世卿松陽人由郡掾選經歷喜讀書每與文人學士爲詩酒會竟夕吟咏諸文士每謂勿及也順治初溧陽相國陳芝山公諱名夏未遇時客栝蒼與世卿訂交旅寓遊三巖作記書扇以贈臨別贈以序



曰余於世卿蓋友之矣又贈以詩有空谷人來可定  
交相從載酒俯僧巢句康熙己亥相國孫陳世超來  
宰松邑求遺墨題詩其後宣平令晉陽雷仁育錢塘  
進士黃大齡孝廉何文爽袁班皆次韻和之重相國  
之文抑以表世卿之風流蘊藉云

劉傑字漢元松陽人廩生讀書好學善屬文尤工詩賦  
著吾廬文稿貧介自守學師胡重其爲人舉報優行  
督學李以學優品重獎之

丁嗣任字又伊松陽廩生讀書好學善屬文屢舉優行  
擢高等父瑗喜留心當世之務自風俗沿革職官乘  
除具有筆記嗣任據以修邑乘焉

丁植松陽人優貢著有詩稿阮芸臺中丞聞其佳句檄  
儒學索呈全集適已人亡稿失

蔡士梁字東橋松陽人品端學粹工書法掌教書院士  
林重之

潘益恭字謙谷松陽諸生工詩畫游幕江右聲名遠播  
葉叢蕙字君瑞松陽廩生教授閭里弟子有掇巍科者  
王玉汝字小扉松陽廩生家貧力學著墨竹山房詩草  
葉方暄字岳松松陽諸生少孤事母孝博古通經著四  
書單字解六卷子景適原名佐辰母病嘗割股以療



沉靜好學經史皆手鈔未冠餼於庠文名藉甚中咸  
豐壬子舉人五策獨出冠時生平著述甚富十三經  
題要經解尤覘實學次子佐清任永康於潛教諭

蔡懋功字華城松陽廩生博學通經史闔邑推爲碩儒  
蔡懋建字午山松陽歲貢學有遠識執經者衆

蔡懋中字東閣松陽歲貢文品兼優書法得古趣

詹巖字巖山松陽歲貢夙具慧才字法精妙

葉賜暢字梅塢松陽廩生能文善隸書兼工詩賦

孟居仁字春原松陽增生工詩文善畫山水名振江浙  
周起芳松陽諸生飽學有識澹於名利終日手不釋卷

沈昌字亦農松陽廩生文思敏捷工詩古試輒冠軍著  
有墨香草堂詩

葉靈芝字聖瑞松陽廩生好學不倦性嚴毅不徇流俗  
丁寅字虎侯松陽附貢生謹恪能文咸推爲老成典型  
鄭文光字愛古松陽諸生孝親嗜學教授有方不干外  
事

陳元颺字煥之松陽人以拔貢任泰順教諭泰邑僻處  
甌南士氣衰靡文體卑弱元颺竭力振興取大家古  
文時爲指授士風丕變年八十四致仕歸

蕭元偉字修宏松陽人天資聰穎爲文雅壯俊麗由選



貢入成均學問益精司業深器重之授巴州判未任而卒

孟修彩字素先松陽人篤於孝友好古博雅游學武林受業於包銀河之門邑令吳甚加敬乾隆戊午以明經肄業太學已而回籍道出鄒魯謁亞聖廟考訂宗譜辛酉授會稽司訓丁憂歸起補上虞訓以年高致仕歸里後詩酒自娛足跡不至公門士有執經請業者必爲之往復辨明終日無倦色壽八十一無疾而終

何承美字在中松陽人敦誠古樸從學甚衆與諸生講

論必正席端坐由歲貢任天台訓導卒於官

徐一孚字爾信遂昌人髫年誦讀過目不忘弱冠補弟

子員蜚聲翼序蹇於數齋志以終

鄭之騷字仲良遂昌人父子兄弟相師友由歲貢任衢

州府訓以文行勗多士終於官

黃豸聲字姚臣遂昌人與族弟懋學俱以童子游庠豸

聲幼卽能詩性好游過豫章與艾東菴陳幼升結社

刻有韻江草黎博庵爲之序吳興蔡止庵督學延訓

其子刻有茗溪冷筆歸遊溫州卒年二十七懋學乙

酉選貢亦能詩卒年二十四



項天琦字韓仲遂昌人以庠生遊北雍性謙厚慎重通經史善書尤長於詩

李春富字竹樓遂昌人廩生博聞強記教子成童即餽於庠文行爲士林宗仰遂松兩邑名雋半出其門以廷試終於京

項世臣字井喬遂昌庠生穎敏博洽著述甚富論易凡十卷工於詩賦梅花百咏尤清新俊逸後以禪隱終包蒙吉字聖修遂昌人以恩貢考選州同改迪功郎爲諸生時文名爛然婺州司理李公之芳延之西席及總制浙閩復延之不赴浙江巡撫王公國安其門下

士請之再三一見而返督學張公衡旌曰潛德象賢年逾七十終著有古史補

王錫字禹功遂昌人每試冠軍所爲文章四方爭誦之由歲貢選奉化訓導不赴著書自娛有偶時吟詩一卷邑令延修縣志以目疾不果卒年七十有六

葉茂林字秀也遂昌廩生甲午鄉試薦魁以策涉嫌疑見遺能詩善書兼工水墨曾入浙東五友社著有飛鶴閣詩畧卧竹亭稿甬上吟戊子饑有鬻妻子者捐金贖之

包蒙亨字穉嘉遂昌人郡廩生爲文得先輩法屢試冠



軍困於棘闈康熙庚午郡伯劉公延修郡乘所著有  
易經衷統合參心齋詩集

黃德徽字慎甫遂昌人工古文幼失怙事母兄孝謹課  
幼弟成名兄歿後育孤姪有聲庠序中乙卯副榜歷  
訓於潛諭餘杭教授嚴州所至督課有方卒於官

王業字肇禹遂昌人天資穎敏以優行貢成均文品爲  
國子冠銓東陽司訓陞錢塘教諭卒

鄭國林字天植遂昌人學問淹博文情如激湍怒濤沛  
然莫禦由拔貢任孝豐教諭餽遺悉屏勿受秩滿歸  
里好讀史弗自知疲至失明猶默誦之年八十餘終

朱奎字星聚遂昌人由拔貢授武義教諭歷四任諸生  
咸霑其化年七十卒於官所著有易經心解四書約  
義詩韻音義註行世纂修金華府志武義縣志金守  
嚴少峯爲之傳

吳心恬字養冲遂昌人資稟過人讀書目數行下竇東  
臯宗伯甚獎許之由優貢任黃巖訓有貧生以逋課  
被繫令將懲以法恬出俸金代完之

朱家瓚字元壘遂昌人由廩生膺戊辰恩選肄業北雍  
兩中副榜初庚午試房考擬元主司以策語忤當道  
抑之銓授廣東保昌縣丞歸里談經論道後學宗之



邑令徐治國延修縣志所著有螺青漚言諸集若干卷

毛桓字克亭遂昌人孝友嗜學文名藉甚工詩善書以拔貢薦舉博學鴻詞掌昌山南明書院所著有荔園文集遠抱樓詩集四書解義

朱楷字翰仙遂昌廩生有雋才漢魏唐宋諸書無不研究所著有梅岡集終年五十八

王正化字熙世遂昌人由歲貢授訓導博學善詩有茂槐堂詩集紀遊詩草行世嘗刊慕善錄牛報篇廣行勸善子瑛弱冠食餼亦著有數園稿芥納軒詩集

鄭家燕字鳳城歲貢生遂昌人經書子史無不研究精微解析書義聽者忘倦父授原鄉教諭隨之任一時名士皆執經請業焉

華明樓字鴻書遂昌人由歲貢選岷縣訓導沉酣於學作文不入時人蹊徑趙石函司訓深罄折之前王令聘修邑乘

童國柱字崑石遂昌人少孤事母極孝十五補博士弟子每試輒冠其曹與弟國梁讀書唐山僧舍學益邃文益高從游者日益進邑令繆君之弼興起義學延爲師卽捨舊塾爲邑學舍由歲貢授餘杭訓導誘迪



士林盡職無曠餘杭被水災奉檄賑卹摘除冒濫惠  
溥而均秩滿歸家不問生業學徒有貧者以修脯至  
悉還之生平著述甚富羣經皆有詮釋尤注意於四  
書研味不輟有講說十卷長洲彭大司寇爲之序梓  
以行世

童汝礪字資先遂昌人由恩貢授教諭端莊醕厚不輕  
言笑文法高古崇實學善楷書手錄經史諸名家詩  
賦文藝及古昔格言累架盈箱年終七十三

劉霞字超然遂昌人郡貢生諸子百家無不流覽所閱  
書詳加評註作文援筆立就武進錢文敏公考校括  
郡閱其文贊賞不置著作甚富乾隆乙酉分修縣志  
華日瓚字在中遂昌人銳志於學右臂以瘋廢能左手  
書性孝友人咸奉爲楷模

王景雲字文郁遂昌歲貢穎異絕倫一日能成制義三  
十餘篇衆以陳大士比之家貧授徒諸生多出其門  
幼撫於祖母俞氏後節孝旌表手鐫百壽磚甃於坊  
上乾隆乙酉分修縣志

周觀鎬字繼豐遂昌人由恩貢授州判改授布理問淹  
貫經史善詩文精楷法壯年游幕後教授生徒以立  
身砥行爲重晚年家居取經史百家摘其要而錄之



鳳州府志 卷之二十二  
年終八十二子皆諸生

周謙字益之遂昌廩生嘗從章北亭太史游北亭以大器期之作詩文古今體無一不工善楷法行草著有賓月樓詩稿

王夢篆字文沙遂昌歲貢篤志好學制義之外酷嗜吟詠應前羅蘭塘明府之聘薄遊弁冀得山川之助詩益工晚年就正於學師陸太冲爲武林梁山舟太史所賞手書集序相遺有窺園詩鈔四卷

黃衣照字孔章遂昌庠生孝友安貧服膺簡策坐卧之處典籍外別無長物工吟咏善書法著作甚富年終

八十有四

葉均字作先遂昌廩貢少穎異出語驚人壯年有聲譽序因得風疾手顫遂援例入成均精岐黃星命堪輿諸書亦無不畢覽四子俱列膠庠

王鑰字守黃遂昌廩生夙智早成年十三游庠幼失恃事父以孝稱友于兄弟篤志好學每虛室獨坐遊心墳索博涉多通

朱燠字正陽遂昌廩貢敦孝友尙節義詩文以性情理法爲宗書法學顏魯公而得其神

俞蓮字賓干遂昌歲貢自幼讀書不問外事試帖制藝



有一往獨得之概食餼後與人以詩文相往來能自出機杼不落前人窠臼

華日融字煦亭遂昌拔貢學優文麗有焦石堂詩鈔歷主須江開陽講席以廬墓居衢郡西鄉嘉慶壬戌大饑傾困周郵是年病故鄉里爲立主於社祀之

童邵字雋心遂昌歲貢幼敏捷讀書數過卽能成誦博洽多聞片刻可成數藝屢試冠軍肄業敷文名公宗匠咸重之家素豐以不理生產因而中落晚年精於岐黃

吳世涵字淵若遂昌人天資穎異下帷力學博極羣書

肄業敷文書院名大噪每一藝出人爭傳誦之兩浙知名士皆慕與之交中道光戊子亞元會試在都羣推爲文壇飛將庚子成進士出宰博陵丁母憂歸服闋改滇南歷署通海太和會澤篆勤政愛民年近六旬以奔父喪舟次中暑卒所著有又其次齋詩文集平昌詩萃十六卷

朱渭字靜涵遂昌人幼聰敏年二十四中道光辛卯

恩科舉人學問淵博尤全孝道母有侍婢貌寢而善調饌母愛之不欲其他適遂納爲妾寓京邸十餘年倡建處州會館家居日又倡捐遂西賓與任湖州儒



學工古今體詩卒年四十餘

葉永英字登者遂昌人少穎異七歲入家廟能書正大光明四字少長讀書過目成誦十七游庠弱冠食餼負笈從杭城吳栗園先生游先生器之邑令朱勿軒徐鐵孫皆重其文咸豐辛亥恩科亞魁所著有繼香文稿

吳世琛字韞山遂昌人天姿穎異未冠餼於庠旋以拔貢考取咸安宮教習丁母憂回里頻遭寇患賫志以終

吳世醕字煦字遂昌歲貢淹貫博洽手不釋卷詩賦文詞援筆立就秋闈薦而不售從遊甚衆多成就者吳沆字藹人遂昌恩貢博記洽聞仲兄世涵以遠到期之羸弱善病志不獲展晚得端木太鶴地理元文注殫精研究洞見本原年近六十而卒

黃景中字恬庵遂昌人天資靈敏學問淵博咸豐庚申拔貢張星白宗師稱爲翰苑之才因道梗未赴都旋卒

黃煦字亦齋遂昌庠生品端學邃工文善書好吟咏有晚唐之致著有心愛集詩文十卷

周立朝字縉卿龍泉貢生學行醕樸以貧病艱於北上



徜徉山水終其身

翁世泮字名芳龍泉貢生有聲文囿試屢冠軍纂修宗譜得歐蘇二家法

熊開世字我瞻龍泉人父夢暘嘗註童蒙訓小學諸篇三子皆能文開世尤工制藝屢試高等順治乙未分修縣志以恩貢授安吉學正轉山陰教諭著有林園雜咏

蔣一蘭字明金莆田人父瞻宸尉於龍貧不能歸遂入龍籍爲廩膳生純樸坦易遊其門者甚衆兩舉德行郡縣俱旌之

季道楨字兆元龍泉庠生性嗜學年八十四猶能燈下作細楷書子孫俱雍穆有古風

吳承詔字對埤龍泉人幼失怙能振家聲學優才瞻詩書琴畫皆善

周評龍泉庠生弱齡入庠文聲藉甚以書畫琴棋爲樂所著有天米記伯瑜泣杖辨禽言樂府

譚文鼎龍泉廩生淹洽經傳從遊多知名士制行恭謹爲一邑端人

林豨龍泉廩生工制舉業國初定入學額十二名撥府四名順治十六年邑令毛炳以田荒民疲詳改小



縣額僅十名士多廢學康熙二十五年猗借葉文箕等呈明督學王公具題得復舊額自是絃誦相聞連聲獻字廷玉龍泉人家貧力學博古通經雍正己酉拔貢與齊召南同舟北上為莫逆交後授象山論著有易學資始齊召南為之序

吳志健字克純龍泉人性孝友嗜學好古尤精篆刻以明經司慈谿訓導以憂歸諸生送之有九年教澤三春雨一片歸帆兩袖風句著有燕游草紀勝集吹豳餘韻世美堂印譜

林撫字幼謙龍泉人幼穎敏讀書日千言長益淵博叩之如指諸掌乾隆庚子六飛南巡獻賦蒙

御賞嘉慶己酉拔貢

甲寅舉於鄉署蕭山教諭授甯海教諭所至振興士習有胡安定風卒年七十有三著有讀史比事甯海典畧龍泉典畧枯蒼典畧西溪賸稿季建功字蘭芷龍泉歲貢博覽經史作文自出機軸不趨時尚館金齋書院栽培後進類多雋才熊占璜字湘潭龍泉歲貢温厚和平工文章教後進以禮法年至八十有六卒

葉楷字式莽龍泉歲貢性曠達工詩文為景甯鴉峯書院掌教至老嗜學不倦年八十有二無疾而終



李逢銓字春溪龍泉廩貢性明敏好學多聞工文善畫  
授徒師範尤嚴

林紹烈字鎬峯龍泉歲貢品端學邃授徒教法甚嚴遊  
其門者皆循循於規矩焉

季瑜字鍾山龍泉人丁酉拔貢善詩文工書法與兄琦  
同乳相友愛赴都應 朝考充八旗教習丁母憂歸  
年五十三而卒

王治模字麗生龍泉廩貢有經世才游楚南應寶慶知  
府魁廉聘襄辦軍務設法團防得保無虞魁廉輯守  
保錄六卷皆治模手筆年三十有七而卒寶慶士民

以有功於彼爲立祀祀之

季烜慶元歲貢讀書至老不倦邑令程君聘修邑志所  
著有詩書本義周易傳義纂唐詩類選古文類選四  
六類林古文摘金等書太史張石虹爲之序督學劉  
公以行潔文正表之

吳運光字暉吉慶元人博學多才善古風行文滔滔汨  
汨有韓潮蘇海之觀康熙丁未設帳於日涉書院當  
湖陸清獻公客游濟川撤臯比而受學焉壬子秋以  
額溢中副車邑令程君聘修縣志乙卯授建陽教諭  
轉政和縣丞子鏐鎬俱丁卯拔貢



季玗字璞菴慶元人讀書過目成誦教人先器識而後  
文藝嘗自謂貧士無德可見能竭情造就卽其德也  
以歲選授蘭谿訓導

余勳慶元歲貢初結文社於石龍山寺邑令李衷繡親  
拔前茅後讀書於萬松庵吟風弄月積成卷帙

吳熾慶元人初納粟爲國學生後恥不受折節讀書食  
餼登歲選丁酉入闈爲額限房考李飛鯤深惜之

姚大霖字惟能慶元人好讀書善屬文由歲選任壽昌  
訓導以孫梁貴贈通議大夫按察使司按察使

吳王眷字天玉慶元人由歲貢任樂清訓導課士之餘

流覽雁宕龍湫諸勝超奇曠逸之致悉達於詩告歸

後家有園曰日涉時集故舊作文酒遊平湖陸清獻

公題其像有濯秀靈峯問奇學海之句

葉上選號蒼峯慶元人刻苦勵志博通經籍由舉人任

會稽教諭有蕪湖之風著有閩遊詩草

周之冕慶元歲貢姿性穎慧廣記博聞爲書院掌教行

文如輕車就熟所著有省愚集卒後督學于公召其

子廩生世俊出所書經術遺芬四字贈之

季天魁字世翰慶元歲貢性耿介饒有古風嗜讀書屢

膺鸚薦留心古文至老不倦孫聖功蜚聲黌序克紹



前徽

姚基字克順慶元增生通經史洞明易象深悉堪輿著有愛梅說九旋操解性孝友善事繼母卒年八十五吳得訓字濟之慶元人博極羣書由拔貢考授同知與青田韓錫胙友善所歷山川風物皆有撰述居家構別業於鏡水園延師以訓子弟

季鍾雋字習齋慶元人性沉靜專志經史百家及聲韻之學督學王公蘭生極賞之以歲貢授甯海訓導卒於任

姚長醕字敦龐慶元廩生雄才高致磊落嶽奇所著詩

文受知於督學錢公名震一時

吳機字上錦慶元人博聞廣見弱冠餼於庠督學彭公

啟豐稱其書卷之氣堪入大家堂奧

姚蒸慶元歲貢好學嗜古所製詩文積成卷軸而謙厚和平人尤仰之

吳元棟字履峯慶元人博洽經史究心制藝試必冠軍

邑令延修志乘取裁獨精

季炳慶元人嘉慶己未由廩貢選授西安訓導莅任十餘年教澤深長爲士林楷模

余鈞字中峯慶元人郡貢生素行端方通經史辛酉協



修邑志

周原字緯九慶元貢生專志經史學問淵博教授生徒多闡發經義邑令譚以詩文相質友事之

余塏字爽庭慶元歲貢少穎異篤志力學未冠游庠食餼試輒優等棘闈屢薦不售選授會稽訓導未赴任而卒

吳登瀛字仙洲慶元貢生博通典雅工詩文性孝友好義舉所著有羣書精華經餘匯參子侗佶亦有聲賢序

吳球字碧峯慶元廩生潛沉好學屢試優等遠近從學者甚衆

季照字玉山慶元歲貢性簡重博極羣書造就生徒循循善誘如坐春風中

田嘉瀚慶元廩生性嗜學工書法講求經籍留心制藝在敷文紫陽肄業秋闈屢薦不售賫志以歿子煌和均諸生

吳爲霖字甘泉慶元廩生性灑落工書法邑中美舉每樂贊襄子熙亦廩生善書

吳肇康字元叟慶元廩生少讀父書博通經史尤敦內行孝友著於鄉邦



吳榮祖字顯緒慶元廩生力學勵行著有素軒吟草學政李以篤實輝光額之

王成績字紀常慶元廩生器宇英特甫成童試輒冠軍留心經史每多闡發精義教諭沈決為遠到之材以攻苦邁疾卒

田嘉脩字敏齋慶元歲貢天性孝友學問淹通善屬文工楷法與其弟嘉瀚肄業紫陽敷文書院名盛一時焉

周大成慶元歲貢博學能文道光壬辰邑令吳延修志乘

姚樹均字平之慶元廩生善屬文試輒優等鄉闈屢薦不售而卒

俞銑慶元恩貢性嗜學博通經籍壬辰協纂邑乘多所參校

吳漙字望廬慶元歲貢好讀書博通經史性鯁直獎善嫉惡無少詭隨尤好義急公里居授徒一時譽髦皆出其門

田謙字桂山慶元拔貢性穎異好讀書行文如蘇海韓潮滔滔不絕在省垣肄業課輒前茅後設帳雲鶴山遠近從學者數十輩



吳江字宗海慶元人漣之弟稟姿穎敏植品端方好讀書至耄不倦咸豐庚申膺恩選知縣汪斌以經明行修匾其門

周煜字昆山慶元人郡庠生性沉静好讀書設帳里門遠近爭負笈云

季垣慶元歲貢性情古樸學有淵源鄉闈屢膺鶚薦以額滿見遺里居投徒推宿學焉

姚律成字晨樓慶元歲貢品端學博肄業敷文書院課輒前茅子蕃官仁和訓導廩生

田和慶元恩貢敦品讀書尤精醫理兄煌早世撫姪慶

餘教育成材

季占雲字仙梯慶元歲貢性孝友博學能文兼精醫理足跡不履公庭知縣蔡烜以澹臺目之

王嘉耀字振先雲和拔貢工詩能文善訓迪遊其門者皆有師法

柳盛枝字逸軒雲和拔貢工制藝尤長於詩古嘗與後進王勣柳之元結爲吟社後授瑞安教諭所著有寄園詩稿

王勣字韻胎雲和歲貢善古文詩詞與兄馮齊名所著有浪游集古今心鏡奇搜便覽



柳之元字文長雲和歲貢性孝友家貧力學工文精書畫尤好吟咏陽羨進士盧士登流寓箬溪極賞之雍正元年舉孝廉方正授臨海訓導旋以年老乞歸壽八十餘終所著有松楸集唾餘草讀史閒評

柳喬彬字祖周雲和諸生聰慧夙成九齡能屬對弱冠工舉子業年三十二而卒著有竹軒詩集

王宗字作展雲和人少孤力學弱冠工制義遇試輒冠其曹中丞徐公遴選肄業敷文主義學席十餘年邑人張濬張濤昆季稟其指授先後拔萃以貢仕新城訓導壽八十有二

尤宗价字維藩雲和歲貢授嚴州分水訓導致仕歸杜門著述至老不輟所著有映而稿耕餘類纂二十卷歷朝詩選若干卷

季永承字達遠雲和諸生工時藝邑令宋雲會極賞之卒以嗜學早世

王汝勳字濟時雲和諸生貧而嗜學弱冠有文名老師宿儒推爲健者卒年三十二著有四書尋源

柳會德字卓禮雲和歲貢善屬文嗜吟詠家無儋石日以嘯歌自適邑令竇絳甚重之

魏精字二五雲和拔貢早歲通經受業於李顯宗尤精



春秋之學晚益勇於爲善子文瀛舉於鄉人謂隱德所致授台州天台教諭著有他石山房詩稿

梅鵬翔字登雲雲和歲貢少力學嫻吟詠邑令陳公器之比卒家貧不能具喪門人醵金以葬

葉培雲字漢倬雲和拔貢以文學著稱授徒龍泉撫軍鍾祥宰是邑賞其文謂瞬當破壁去終不得志而卒王宸正字建章雲和歲貢弱冠爲名諸生倜儻豪邁博極羣書書法雄偉如其人尤工詞賦著述等身歿後散佚有顧廬吟稿一卷

王樹英字毓才雲和恩貢文藻書翰擅絕一時尤長於詩古學使阮文達公梓入淞江詩課邑令陳治策延修縣志著有古槐書屋詩稿六卷

柳翔鳳字儀廷雲和歲貢少孤長爲諸生博通經史尤工制義學使劉鳳誥極賞之著有心筆軒詩稿

梅佳模字鴻盤雲和諸生警敏絕倫下筆千言立就善撫諸弟樹拔貢榕咸豐辛亥 恩科副榜遂於經學爲歷任宗師所賞署象山訓導卒

林日芳字芬甫雲和歲貢能文工書名重一時性恬退不求榮利恂恂溫雅人遇之如坐春風

王維藩宣平人順治間署黃巖諭旋補歸安莊重溫雅



高曠之致逼人眉宇著有燕遊草

潘文韜字六函宣平人天資明敏過目不遺應童子試卽下筆驚人邑令侯霓峯器之年二十四登賢書授

黃巖諭

祝聖明字德輝宣平恩貢丰采秀偉資敏學博年五十餘授益都令未赴卒

李仁均字俊三宣平人苦志讀書以任子選貢授仙居訓未任卒著有抑齋集

鄭之桓字錫公宣平歲貢雍正間任龍遊學訓實心課士年七十餘卒於官

鄭之鼈字士挺宣平歲貢時藝力追先輩詩時有警句一邑令魏儕周極賞之所著有竹箭集懷松軒草

鄭權字秉衡宣平人博學元談豪放不羈年逾古稀多著作喜清吟郡伯劉玉衡贈以潑墨宗摩詰揮毫若右軍句

鄭廷相字翼臣宣平拔貢博通經史詞鋒挺健設帳曹門祝村間遊其門者甚衆

鄭文元字康成宣平人年十歲舉神童及入泮力學工文藝晚登歲薦

梁祚璿字璣辰宣平拔貢博通經史學識俱超雍正間



仕湯溪諭未幾賦歸士民書克宣乃猷于湯有光扁  
之年八十餘所著有味道螢雪曲肱藜說續高識傳  
陶錫環宣平廩生師事梁璣辰爲文得先輩法督學彭  
諭令訓課後進發公項三十金以資膏火

陶國器字觀成宣平拔貢爲文清矯兼工書法與鄭翼  
臣同居陶溪乾隆乙卯辛酉前後並登拔萃科

潘士珍字邦儒宣平人刻苦下帷至老不倦年五十餘  
登歲薦並善歧黃術

潘士緯字拱辰宣平廩生經魁文韜次孫性篤孝友力  
學好古師事梁璣辰文詞益工邑令于延訓其子次

子敏中乾隆丁巳大魁天下

鄭瑞鳳字啟周宣平歲貢年未冠閉戶讀書能通經籍

乾隆間任嘉郡訓振鐸有聲

潘可珍字賓彩景甯人以貢官桐廬訓導沉敏嗜學手  
不釋卷詩文清粹可讀復署教諭時邑令分校鄉闈

郡守委徵糧務士民踴躍輸納令回喜曰吾愧先生  
矣以老致仕終年八十九

王家謨字顧典景甯人康熙甲午貢官瑞安訓導課士  
首品行而次詞章學者翕然宗之致仕歸年七十餘  
多士爲作雲江餞別圖



潘東陽字日精景甯人康熙丁丑選貢幼穎異成童卽受知邑令劉宗沛有羣雞一鶴之賞雅好讀書文法高古

潘可藻字賓文景甯人少負奇氣淹通典籍工詩文繪事旁及岐黃術數諸學以貢選訓導不仕嘗製丹丸施人輯經驗方兩修邑乘所著有懶雲集

潘肇姬字周屏景甯人穎敏好古以拔貢入成均考居第一肄習期滿例得銓用未一載丁母憂歸

葉昊吉字光宇景甯諸生殫心理學乾隆初年以天下治平著草茅管窺論持盈保泰之道剴切直陳吏治

民生利弊幾萬餘言他論說亦稱是

毛啟元字會昌景甯人天資英敏積學好修及冠登拔

萃科中乾隆丁酉舉人詞華富贍有六朝人風度

柳光華字麗天景甯人工制藝試輒冠軍應英子

南巡召試後已酉府學拔貢大興朱文正公按試時目爲東

箭南金

吳徠松字魯材景甯人郡增生家貧力學詩文高古不落蹊徑人以其博洽目爲吳書厨

鮑騰蛟字士宗景甯人未冠食餼工選學嘉慶間從邑令王之屏冢嗣萱齡遊究心箋注惜未竟而卒

處州府志

卷之三十一

文苑

七



陳之東字問源景甯拔貢究心經籍於史鑑手自丹黃  
文詞揮筆立就書法逼近誠懸兼工草隸屢薦未售  
而卒

潘漪字澄鑑景甯恩貢自幼孝友積學端品課子授徒  
凡關於世道人心處猶切諄諄文心靜穆一本先民  
矩獲年週甲猶勵志讀書自謂如六歲兒云

隱逸

處郡星應少微世多處士郡以得名石隱巖栖不求  
聞達代有其人既不解南山之捷亦無俟北山之移  
遠稽載籍近採鄉評與純盜虛聲者有間矣

宋

孫薪字至豐麗水人元祐中以明經擢第授荆門軍教  
授不赴質性清介與黃葆光爲太學舊遊宣和間黃  
以侍御史出守處州薪不屑謁黃約會於洞溪僧舍  
贈以詩云勸農因到好溪頭把酒相看憶舊遊三十  
年來如一夢可憐空負釣魚舟及卒年已八十矣  
朱上交麗水人安貧樂道行義著於鄉里聽聞於朝詔  
徵不起賜號養素先生

王巖字敬之麗水人少負俊才善詞賦咸淳末受知於  
宣慰李公屢薦不起嘗捐已財砌浮雲二鄉石衢四



百餘丈人頌其德焉

余璘字仲文青田人不樂仕進博覽文史著有介山集  
劉若濟字君用青田人咸淳進士義不仕元自謂出於  
六民之外別號爲七民校正石門洞集

林偉青田人嘗仕宋著斥佛論崇儒錄後避亂隱居八  
都

王昌言字均用縉雲人官至左武大夫知武州紹興四  
年蜀亂棄官歸隱箬川號滄洲醉叟

張又孫字明仲縉雲人通五經淳祐王子與子九萬同  
舉鄉貢試春官俱不偶卜於三衢劉氏其繇曰曩年

曾照仙都月今日空懸上國春遂不仕

趙雷字省之縉雲人從滕璘學授考亭心法名冠當時  
隱居不出

施勣字彥功縉雲人爲大理評事致仕晚年廬墓甚得  
林泉之趣

周頊字成珍遂昌人不樂仕進侍讀楊萬里疏名上宰  
相薦於朝詔徵不起與鄉人進士華延年周若思講  
明經義隱居西郭

吳戴字叔才龍泉人登第後歸隱郡守孫沔奏使教授  
州學部使者亦薦於朝詔賜粟帛嘉祐中訪求遺逸



沔復奏薦之不起授將作監主簿亦不受卒諡沖和先生祀鄉賢

管師復龍泉人從胡安定學有盛名仁宗召至問曰卿詩所得如何對曰滿塢白雲耕不破一潭明月釣無痕臣所得也賜爵不受歸人稱卧雲先生有集行於世

吳元輔龍泉人德行文學有陳太邱遺風仁宗朝詔徵不起封靖里先生

鮑剛字弱翁龍泉人少負大節善屬文尤長於詩舉進士不第曰此非吾所學也遂徜徉於東南山水間時

將士陶弼者有能詩聲少許可得剛作以為出己上願為友剛與呂惠卿善熙甯中惠卿叅知政事欲用剛剛曰吾老矣即日出京元豐末疏天下弊事將獻之朝其畧謂四方用師須擇將帥往年韓范諸公經營關中大功雖不成而朝廷亦無他憂兵柄至重不可以委任中人又謂江淮以南縣官計戶口多寡為鬻鹽今民無計得錢以償縣皆願淡死恨生無聊也無聊之民其毒可畏會神宗崩不果上元祐五年七月卒於秦州

元



陳桂芳字稅理麗水人訓導鄉校隱德不仕

王興祖字君起麗水人博學好古為後進儀型隱居不仕

葉熙字敬仲麗水人通春秋經任教官退隱不復仕

吳文煥字國光麗水人治春秋典教縉雲未幾歸隱號

小栝山人

吳宗文麗水人通春秋隱居西山鄉人高其行誼以野

齋處士稱之

黃許字與可麗水人號南岫通詩經隱居不仕

蔣琰字叔圭青田人居南田莘野宋中丞繼周之裔家

貧授徒自給足跡未嘗至邑詩文師韓杜有葆光集

陳谷字賓鳴青田人世居郡城遷南田谷隱居好古詩

文有奇氣為時推重著有存存生集子惟初仕訓導

留睿字若愚青田人避地越上集當代節義事為傳歸

隱好溪有紫芝元鶴之瑞著書九篇名曰留子

陸平疇縉雲人通經史以詩酒自娛徜徉山水間性凝

重人以古君子稱之

應覺翁縉雲人博覽古今不以利祿動心著有蒼山集

周權字衡之松陽人通經史工詩至京師歐陽元薦與

館職以母老辭歸有此山集



毛輝字彥明松陽人博學雄詞總制孫炎薦署學事不起嘗曰吾讀書學問自分治身理家修德承祀以全歸耳竟樹卉種菊入紫青山中卜地為窰穴名曰全歸窩自呼曰介夫士友以其愛菊類陶稱之曰潛齋先生今白龍山下有潛齋書院遺址

葉可權字國衡遂昌人讀書樂道尤工於詩嘗為教官誘掖後進人咸景慕之尋歸隱

周與昂字天常遂昌人通史籍精卜筮以耕雲處士自號終老邱園未嘗入城府手蒔松竹梅於屋側有古逸民風

尹廷高字仲明遂昌人善詩嘗任處州路學教授尋歸隱有玉井樵唱集學士虞集為序

潘永滿字天澤遂昌人博學善詩文御史中丞章溢屢薦不起人稱其高

王鑑翁字子明遂昌人賢良濬之父號樂天處士其卒也太史宋濂撰銘誠意伯劉基篆額學士陶安以詩弔之有直道追三代之句王禕以孟之善士易之幽人稱之為名流所推重

劉明字峻明龍泉人博極羣書詩學尤粹元安南獠苗為亂提兵勦除民賴以安後退隱李文忠屢薦不赴



與劉伯溫胡仲淵相友善有詩倡和著詩集四卷

季德巽字齊甫龍泉人文德典型隱居不仕子仁壽字

山甫種學績文教授婺州治易書詩春秋四方從遊

者衆號四經師

案麗水縣志季仁壽傳父德巽舊志作魯德巽蓋誤季爲魯

明

李參字景參麗水人號行簡高致雅德工吟詠洪武初

詣京師應制賦鍾山曉霽長律稱旨賜宴命需次錄

用以母老辭歸家門之政肅如子弟化之三世不異

爨有泉石藁若干卷藏於家

王德均字志衡麗水人好禮樂道不干勢利屢徵不起

隱居清趣亭以終其身

葉子曉字啟明麗水人善詩文甘窮約人有餽者曰無

事而受非義也有司嘉其賢上之徵辟不應

沈琇字廷潤麗水人少貧力學工詩善歷數和而不同

自號雙溪漁者

吳叔圭麗水人博學善屬文洪武中舉賢良方正不就

隱居終身

王雋字叔英麗水人雅志詩書不求仕進著有友梅集

槐屋集

鄭玻字仲彩麗水人勤謹謙厚有司以賢良方正辟之

麗水府志

卷之三十一

隱逸

七



力辭不受

鄭希穆青田人隱居東谷以詩禮授徒有拙庵詩稿  
王可與字希璵青田人能文善書永樂間郡守謝子襄  
以賢良薦不就隱居授經時論重之後仲子皎領鄉  
薦孫諫應制科

沈孟操號東麓老人青田人正統間都閩馮君將兵勦  
寇至栢聞其賢延至軍中多所咨問欲薦之仕辭不  
受所著有東麓集

洪炷字以敬青田人抱經濟才不願仕進構耕雲軒題  
曰賓來只煮山中雪親在須耕隴上雲受知憲副項

公維聰薦徵中書舍人辭不受又有餐霞傲鼎祿製  
薜勝朝衣之句

樊濬字時清縉雲人號澹庵少嗜學善詩晚居雲門山  
有雲門集仲弟源從弟通皆好吟詠不仕

丁陽生字朝初縉雲人恬素樂善克敦孝友鄉閭之望  
歸之以子如臬貴贈淮安府通判

李洙縉雲人好讀書善詩畫僻隱雲塘士大夫高其風  
節從者不絕屢縣令莫君過訪不遇留詩云五雲狂  
客下東鄉座上無人肯舉觴後縣令楊君來顧足之  
云細數落花懸望久停驂默默對斜陽



朱允光字汝亨縉雲人素性情淡不欲仕侍寡母服養備至撫孤甥處庶兄終無間言縉俗多湮溺光育四女六男卓有成立葺宗祠賑鄰里知縣王懋錡旌以賓筵

梅隱字聘君縉雲人徜徉山水好植梅後人改其山曰梅山名賢多吟詠有梅山集

葉偉字伯奇縉雲人通詩書與范霖友霖以時彥自負約偉出仕偉曰古人四十而仕吾年過之進將奚爲樂天知命吾志也固辭隱教鄉間一時表率

李遇曦字汝晦縉雲人性孝謹暑年失怙不忍讀父書

放情山水任意行吟壽七十有九

李騰蛟字舒懷縉雲人博綜經史入太學從王圖先生游聲蜚南雍晚入山閉戶讀書著不窺園草行已溫恭儉樸力矯時奢邑里推重

王有德字懋修縉雲人敦行古道不求聞達壽日泣然淚下曰誰云七十古稀老萊班衣猶是晚慕堯夫之學絕筆詩有懶向棋枰揣得著又從詩譜起長思之句

樊侃字伯毅縉雲人謙謹循理不嗜勢利讀書求大義尤耽吟詠所著有懷養集



李忱字子胥縉雲人善詩嗜山水優游自得有雲外集及樂府數章

趙儀縉雲人博通經術稗野諸書無不淹貫人勸治舉業曰苟經明行修不辱世履足矣何必通籍嘗從程文恭公游得王文成公宗旨萬厯戊子禡疫飢死無算詔有司施藥發粟知縣龔君廷賓令儀主之殫心調度全活者數百戶給冠帶旌額辭不拜手輯家乘六卷題曰世芳摘集有靜齋拙稿

陳德詢號少微山人松陽人博通經史雅志高尚好山水遇佳勝處輒延伫遐想題詠精絕一時名士多推重焉嘗膺聘不起所著有少微集藏於家

包公慶號九芝山人松陽人能詩文善書劄當道每欲推舉之辭以疾壽七十五

練魯字希曾松陽人至正間父進官京師魯以宦籍就試中第元主北去魯南還不復語及出處隱居事親遭母喪哀毀逾節比葬廬墓六年明太祖詔徵魯力辭不已至武林著辭病詩九律悲壯哀鬱歸閉門謝客著有崆峒集傳於世

包夢吉字維祥遂昌人讀書慕古不欲仕進自甘隱遯洪武十五年以賢人君子徵辭不赴



季汝字彥文龍泉人明祖既渡江遂克處城是時起兵之士麗水葉琛青田劉基龍泉章溢與汝入見便殿汝以老乞歸故其名不顯卒年六十宋濂爲之銘

趙德光字子明龍泉人冲粹謙和扁所居曰樂善讀書忘寢食於世紛華澹如也或勸之仕不就一日道拾白金遺金老嫗哭於途日子爲寇得得金則得子德光歸其金石抹宜孫器重之著有松雲樵唱筆畊記謬桃源舊稿若干卷

季喜字景信龍泉人博學篤行值元季亂甘心遯世號樂隱晚號善樂老人

流寓

鶴田闢境詩宗八斗之才鹿洞傳經理闡千秋之緒仙都道範講席依稀石洞遺蹤磨崖搜剔若夫棲遲林麓卜築巖阿高躡流連芳嶽綿邈懷賢記蹟自昔傳今備著簡編增輝山谷

晉

謝靈運爲永嘉太守嗜山水經過縉雲間有題詠今之屐山與康樂廟其遺跡也

唐

葉儉字靜能會稽人遍游天下名山勝地至松陽登卯

流寓

卷之三十一

三



慶州府志 卷之二十一  
山卽大喜遂卜居焉其孫法善以道術鳴世封越國公子孫多居其下

宋

王伋字肇卿一字孔彰汴人其祖訥因議王樸金雞厯有差衆排之貶居江西贛州伋因鄉舉不第遂精地理學棄家浪游見龍泉山水秀麗遂家焉伋爲人卜兆獲福者甚多人以地仙稱之卒後門人葉叔亮傳其所著心經篇問答語錄范公純仁跋之曰先生通經博物無愧古人異乎太史公所謂陰陽之家者矣沈晦字元明嘉興人宣和六年廷對第一人建炎三年

出守處州愛松陽山水之勝遂家焉凡厯守十九郡官至太中大夫直徽猷閣給事中時干戈擾攘事勢多艱悉能保全名節有宣和御製賜宴詩刻於學開國子婁鑰書其事

朱文公爲台州提舉以彈劾忤旨嘗寄居縉雲仙都徐凝故宅

趙希懌字叔和祖伯仁宋太祖七世孫寓居青田登瀛熙進士守信州諸邑積逋數萬悉蠲之郡計亦無缺提舉江西歲飢賑濟給憑令民就糴民甚便之厯官至端明殿學士昭信軍節度使開府儀同三司贈少



保追封成國公諡正惠生平多茹蔬施藥凡可以濟人利物靡所不爲子與篋與慙與勲皆貴顯與愿甯宗召入宮賜名曦封榮王開禧三年立爲皇太子改名詢初寓居縣東百步新市巷及召入迎以寶幢導出此街因名寶幢街在東宮講誦不輟嘉定三年薨朝野惜之諡景獻子孟至孟奎孟奎皆登科鄒應龍福建邵武人宋慶元丙辰狀元累官至參知政事試禮部時出麗水人葉挺之門挺以女妻之因家麗水名其所居坊曰德星里

明

夏清伯號愚樂永嘉人治尙書嘗過縉雲樂風土之勝僑居好溪之上著有宋史提綱四十卷楊庸字文仲天台人登進士授蘇州府經歷以註誤解職僑寓縉雲著有菊軒集

藝術

軒歧和緩施濟同功顧陸鍾王流傳弗替下逮風角日者皆可專門名家彼道德文章之彥遇智能技巧者流未嘗不傾心推重者以其精能之至也在聖門爲小道神而明之非存乎其人與

宋



劉夢求麗水人工術數未嘗爲邵氏學而知人休咎術行於三衢遂爲衢人士大夫過衢者以不問夢求易卦爲恨永康陳亮爲文以張之

元

張夢庚松陽人遇異人授易元末召居將幕推步有驗後復懸壺於市賣卜一日有葉姓者無子多娶妾求卜庚以詩二句授之曰不是桃花貪結子更教人恨五更蜂謂此老風字且不識何談理數乎其人養蜂數十櫃一旦蜂出冒雨收之忽集其面螫而死人以爲神

毛梓孫松陽人好軒政術受業於顧希武時御史吳叔潤病瘡羣醫無措梓孫以數劑瘥之程恩與病惡寒已易簣梓孫曰可生使掘甕置火設纊令卧其上覆以重衾用釜煮藥蒸之卽起人以神醫目之

明

祝定字伯靜麗水人洪武初授本府醫學提領轉正科註竇太師標幽賦醫家咸宗之

鄭益純麗水人多技術尤善音樂洪武初詔州縣以雅樂釋奠頒成書於天下時無知者益純獨能察音律教諸生後舉入成均



聶瑩麗水人得湖州凌漢章鍼法針至病起雖厚衣可  
按穴而定人稱神醫爭迎之

戴聰字德卿處州衛人幼習儒長精方脉妙七起疴不  
計功利時值疫災連活數百人直指郡邑迭表厥間  
呂文英麗水人孝宗朝以善畫供奉時呂紀以翎毛文  
英以人物同被恩寵人呼文英爲小呂以別於紀焉  
陳應元字菊庭麗水人性孝友尤善岐黃明季時所全  
活甚衆子啟慧啟秀紹述其業著有經驗良方爲醫  
家所宗

陳言字無擇青田人敏悟絕人長於方脉治病立效不  
可救者則預告以期無爽作三因方論研窮受病之  
源用藥之等醫者宗之其徒王碩爲易間并三論行  
世

田偉字伯遜縉雲人父錫孫以醫鳴偉克紹其業病者  
授藥無不效

宋宗遠縉雲人丰儀峭古多術能文工畫山水筆格迥  
勁得烟巒奇態爲畫者所宗

徐進字公蘊縉雲人性機巧學丹青尤精於寫神凡人  
一經目雖數十年後寫出逼真子迪亦能得父術

周漢卿松陽人善醫鄉人蔣仲良左目爲馬所踉睛突



出如桃他醫謂係絡已損不可治漢卿封以神膏越三日復故華州陳明遠瞽十年漢卿視之曰可鍼也爲翻睛刮翳歛然辨五色武城人病胃中痛奮擲乞死漢卿納藥於鼻俄噴赤蟲寸許口眼悉具痛旋止馬氏婦有娠十四月不產脛且黑漢卿診之曰此中蠱非娠也下之藥有物如金魚病良已永康人腹疾痾僂行漢卿解衣視之氣衝起腹間者二其大如臂刺其一砉然鳴又刺其一亦如之加以按摩疾遂愈長山徐嫗遘癘疾發時手足顫掉裸而走或歌或笑漢卿刺其十指端出血而愈錢塘王氏女生瘰癧環

頭及腋凡十九竅竅破白瀋出將死矣漢卿爲剔竅母深二寸其餘以火數日結痂愈山陰楊公項有疣如瓜大醉仆墜下潰血不能止疣潰者必死漢卿以藥糝其穴血卽止義烏陳氏子腹有塊捫之如罌或以爲奔豚或以爲癥瘕漢卿診之曰此腸癰也用大鍼灼而刺之入三寸許膿隨鍼迸出有聲愈諸暨黃生背曲須杖行他醫皆以風治之漢卿曰血澁也刺兩足崑崙穴頃之投杖去其捷效如此

明史  
景

季董龍泉人善星命遊京師見成祖於藩邸知天命有在永樂初召見授御史中丞



俞存熙龍泉人能詩善畫山師事永嘉趙仕謙而筆趣過之永樂中召爲金門畫士未幾引疾還子原澤亦善畫

項賢輔龍泉人能詩工草書人得其書以易鹽商計字各酬鹽一簣遂擅名一時

吳金陵龍泉人字邦畿父初遊太學生於金陵學舍因名讀書過目成誦善畫鷹尤長於琴所著有畫鑑直指琴譜指南

陳孝積龍泉人工醫涉獵史學所著有龍泉縣景物志行世

吳伯參精太素脉指晰人禍福修短無弗驗有脈宜死者爲定其時日至期無爽

舊志不書本貫附列於此

杜璇精於星命言禍福貴賤無不驗名著遠邇當道士大夫皆信重之上

國朝

陶瑞齧縉雲人號道柱又號餐霞逸人康熙間庠生業岐黃尤精女科傳授紫虛真人口訣彙方一百四十有奇活人無算著有紫虛口訣二卷

虞桃字卓人縉雲諸生性簡淡不喜習舉業家多藏書昕夕耽玩寒暑不輟善岐黃療治卻金全活無算



周長有字邦楨遂昌人業儒未就即習醫究心內經數十年不釋手年九十餘卒著有內經翼註十二卷

王灝字融昭遂昌人庠生天資敏捷讀書過目不忘精岐黃之術應手取效不起者為定時日無爽遠近來診車轍常盈於門人以重金酬之悉卻不受年逾八十卒

曾有齡字爾遐龍泉監生精醫理診視多奇效貧者不計酬邑令沈尙恩贈以扁

丁尹咸字卜之龍泉增生精形家言著有忌樂指要行世

陳于公慶元人少業儒後工醫有產婦將娩而氣絕診之曰尙可生也取黃土一塊攤臍上用銅盤盛水置耳邊細篋敲盤不數刻而生人問其故曰此婦下焦熱甚兒不敢下直上心頭抱母肝肺是以氣絕吾用黃土以清其火復以金水應之心清魂定兒下而母生矣邑宰王開泰頗知醫道誤自下藥病轉劇召其切脈曰無能為也不過七日矣可速料理諸務王聞之歎曰真良醫也如期果終所著有傷寒辯論等書  
潘震江宣平諸生精岐黃病者隨手取效金華紹興等郡尤推重之年七十餘郡有黃姓婦得疔羸疾延之



投以藥病漸瘳黃之鄰母猝中風疾手足拘攣口不能語延潘診投以大劑他醫見其方嗤爲妄以方用生半夏生南星戒勿服次日復診按脈畢曰是尙未服吾藥屢診何爲迺以他醫之言告潘曰能言者服之則啞啞者服之則能言矣何患焉從之服三劑果能言而起爲定一方臨去屬曰必服百劑乃可少則疾復發右手青腫雖盧扁無能爲其家謹遵其教次年粵匪陷郡城蒼黃出走深山中無從得藥十餘日病復發果以右手青腫亡而黃姓婦則至今猶健在焉

方外

函谷傳經漢廷徵夢二氏之教由來久矣後世黃冠緇侶襲其迹者所在皆是栝蒼山林幽邃尤焚修葺萃之區其人淡泊寡營清淨自守例以齊民猶賢乎衆當與仙釋靈蹟並傳

漢

戴火仙漢人入松陽大明山修煉道成陽精畢露於頂每晚輒懸於山若太陽照人人共見之故名火仙

吳

擗衣仙龍泉人結庵於鳳山之巔持守雌抱一之道童



顏黑髮不御飲食人或問其壽幾何但答曰八十歲也赤烏中坐宮前槐樹上俄祥雲四合天樂鳴空遂飛昇其庵址尙存

隋

尹真人隋大業中丹成舉家上昇今勝因院其故宅也宋龔侍郎原作勝因院記頗詳其事後原守揚州有道人謁原題疏欲得錢萬貫原如數與之道人至和州置田宅器具交易標記悉作龔名後原謫和州道人來請入宅云田土器具皆公揚州捨錢所置或云道人卽尹真人也報其爲勝因院作記耳

唐

三平和尙中和間築精廬於南明山是爲大安寺每日騎虎出山至溪津叱虎還徒步入城晚虎出候於溪載還山以爲常

馬大仙麗水鷓鴣村女子光化間旣嫁家貧養姑尤謹遇異人授以仙術往來傭織去家百里食有羹不食卽以傘浮水還家薦於姑羹尙熱頃之復回人始知其不凡呼爲馬大仙

鷓鴣村今在景甯縣卽所祀馬夫人是也

羊愔由明經授夾江尉罷歸括蒼山一日與青蓮觀道士飲於阮郎亭酒中忽仆地七日乃寤詰之云初見



青幘絳服一人自稱靈英邀入洞中殆非人世須臾  
石間有物迸出靈英指曰此青靈芝也食之得仙情  
取食甚甘白是惟飲水覺身輕骨鳴日行百里時見  
兄忻任樂安令每往省之輒朝去暮還後入委羽山  
人莫之見

閻邛方遠字大方宿松人幼而辨慧年十九問大丹於  
香林左元澤復訪仙都山隱真巖事劉處靜學修真  
出世之術三十四歲受法籙於天台玉雷宮葉藏質  
真文秘訣盡蒙付授而方遠守一行氣之暇仍篤好  
子史羣書每披卷一覽不遺常自言葛稚川陶貞白

吾之師友也詮太平經爲三十篇備盡樞要其聲名  
播江淮間昭宗景福二年錢塘彭城王錢鏐深慕方  
遠道德訪於餘杭大滌洞築宇以安之昭宗屢徵不  
赴乃降詔褒異就頒命服俾耀元風賜號妙有大師  
元同先生天復二年二月十四日沐浴焚香端拱而  
坐俟亭午而化顏色怡暢屈伸自遂異香芬馥三日  
不散弟子以從俗葬舉以就棺但空衣而尸解矣後  
有道俗於仙都山及廬山屢見之

陶松隱住佑聖觀得元修本領將有祈禳者輒先知之  
使道童候門人以仙陶呼之年踰九十居隱仙都山



松林間辟穀數月不知所往

吳善經縉雲人自幼習道絕嗜慾長遂不娶隱仙都山以濟人利物爲念太清宮三洞碑銘云先生族系於東吳築室於仙都演道於明庭棲神於太清隱機於開元歸根於露仙其來適然其去寥然

法華尊者縉雲人號智威禪師嘗說法於慧明寺龍化爲白衣叟來聽

元白縉雲人身長七尺眉目如畫久居仙都括蒼二山辟穀養氣後之撫州南城縣內仙逝

許碯縉雲人居仙都辟穀養氣十餘年名山遍歷吟詩

曰閩苑花前是醉鄉攀翻王母九霞觴前賢拍手嫌輕薄謫向人間作酒狂或詰之曰我天仙也方在崑崙就宴失儀見謫每當春景插花滿頭把花作舞醉歌長往莫知所終

杜光庭縉雲人咸通中與鄭雲叟賦萬言不中遂入天台山學道應制爲道門領袖僖宗從幸於興元後隱於青城山蜀王建封爲廣城先生年八十五而逝時人以爲尸解有文集百卷

見文獻通考補遺

葉法善字道元松陽人世居卯山母劉氏夢吞流星而娠及產神光滿室異香彩雲繚繞七歲涉江三年不



返人問其故云二青童引我飲雲漿既長道成忽老  
叟詣門求曰我東海龍也上帝敕主八海之寶有幻  
僧於海畔晝夜禁呪積三十年海將涸統天鎮海之  
寶必爲所取乞救之法善乃敕丹符飛往有頃海水  
復舊幻僧愧歎赴海死明日老叟輦奇寶來謝法善  
辭之因曰此山缺水但得一泉足矣是夕風雨及明  
館側有泉迸出每旦夕有二墨魚浮水面人不能舉  
蓋泉與海通故也高宗元宗先後召入極言丹不易  
就請罷方士嘗於中秋夜引帝遊月宮及上元夕往  
西涼州觀燈至爲奇事其叔祖靜能爲尙衣奉御遷

國子祭酒法善授金紫光祿大夫歙州刺史開元八  
年庚申法善化去元宗加贈越州督

鄭仙姑姊妹二人同心學道求謝自然師之每靜夜焚  
香求度忽一女奴歌曰坎離坤兌分子午須認取自  
家宗祖地雷震動山頭雨要洗濯黃芽出土捉得金  
精牢閉固煉丹庭要生龍虎他人間汝甚人傳但說  
先生姓呂姊妹聞而習之又得葉法善入使雲屨之  
法白日可騰空凌雲化鶴神妙莫測

葉藏質法善孫精符術隱玉霄峯懿宗屢召不赴一日  
忽語其友以行日及期題其門曰雞鳴時去門人聞



珠珮雜簫管聲於雲中視之已化去無形矣

豐去奢龍游人僖宗時慕葉真人道術居卯山初真人藏劍丹於卯山東南巨石下謂其姪仲容曰吾去後百六十年當有一人於吾舊居修行得吾藏劍丹其道更過於吾及乾符末去奢果至山修煉得之會麗水人華造擁亂索去奢劍丹因囚之密室數月不與飲食及開如故造異之留其劍丹遣之一夕大雷電劍丹復歸石下去奢仍居十年不出天祐中上昇

劉處靜字道游沛國彭城人其先避地家遂昌唐肅宗與丞相李泌爲友遇異人授以吐納之術肅宗召見

賜緋衣退居仙都結廬金洞側咸通十四年六月辛酉解化自撰元虛志後數年有鄉人於襄漢間見之語其弟子啟墓視之所存惟劍履

五代

貫休號禪月大師五代時嘗結廬於遂昌之唐山居十四年夢神人授以寫梵相十八尊者之像獨有一像未就異人授以臨水爲之以師乃此像後身也及應吳越王之請獻詩有曰滿堂花醉三千客一劍霜寒十四州王欲爲改詩作四十州師曰詩亦不改州亦不添後吳越所據州止十四師蓋先知之也繼去蜀



蜀孟氏二女尼欲遊天台師教之唐山見尊者至則  
衆皆現身尼乃告其故及返蜀見師述所見師曰信  
爲諸佛之母汝能信則種種應期而現宜再往勿憚  
後三年復至獻袈裟鉢盂盞橐各十六事質休字德操蘭谿人  
游道者法名善幽受業於遂昌之重光院與人無忤犯  
之亦未嘗失色每晨摘野蔬以腐薪烹之不用常住  
寸薪尺芻一日跌坐而逝院僧納之棺坐如故時吳  
越錢氏聞之爲之妝塑真身建殿祀之  
馬氏女慶元人五季時姊妹二人白日飛昇山巔有剪  
尺鏡臺遺跡

宋

解脫和尚在南明山嘗月夜靜坐依華嚴經入佛光定  
感化佛出現

明覺大師在南明山雪竇禪師頌之曰三界無法何處  
求心白雲爲蓋流水作琴一曲二曲無人會雨過夜  
堂秋水深

王應廉字正夫麗水人天慶觀道士受上清法錄政和  
二年賜紫衣得養氣之術於西蜀李曼老紫氣溢眉  
間讀南華經得其趣士大夫樂就之清談竟日戶外  
之屨常滿所居室曰渾淪庵



守約麗水人誦法華經有悟人稱之曰約法華遍住鄉  
之諸山晚住天王護法院嘗夜歸守門行者夢伽藍  
神呼之曰佛歸起開門師適及門寺僧咸異之後跌  
坐化

立禪師麗水人住法海寺時徽宗幸林靈素改寺爲神  
霄玉清萬壽宮師上堂云都緣未徹所以說是說非  
蓋爲不真便乃分彼分此我身尙且不有身外何足  
道哉今聖君垂旨改佛殿爲神霄釋迦老子頭上添  
箇冠兒有何不可老僧不免橫擔拄杖高掛鉢囊向  
無根樹下嘯月吟風於無縫塔中安身立命去也一

任乘雲仙客跨鶴高人來此咒水書符叩牙作法他  
年成道白日上昇堪報不報之恩以助無爲之化惟  
恐不是玉是玉也大哥且道山僧轉身一句還作麼  
生遂擲杖端坐而化

盧葆真名仲璠紫虛觀道士遊名山風標高爽心境靜  
虛年八十一乾道三年六月三日作頌示衆坐小軒  
揮扇逝太師何公偁以詩憶之云不見高人盧葆真  
洞前松竹幾經春白雲中斷來雙鶴彷彿悲鳴是故  
人

徐泰定字虛寂紫虛觀道士尙書梁汝嘉墓在松陽縣



萬山間有觀行庵開禧初泰定居之一日有吹雙笛道人至庵與泰定語相合授以丹訣仍贈筆一枝令作水墨山水泰定謝不能道士曰但隨意爲之遂畫如素習後十年道人欲挾之遠遊泰定辭乃留詩別去鐵笛雙吹破曉烟相逢又是十年前曾將物外無窮意總付毫端不盡傳白髮數莖君老矣青雲一朵我飄然世間究竟只如此何似同歸洞府天泰定年八十餘童顏端坐而逝吹笛道人自稱李洞明疑呂洞賓也

葉光大麗水人淳祐間寓紫虛觀一日遇兩道人奔於觀後山光大異之遂求道期以明日來詰旦光大往候不見至晚遙見兩道人在山頂上復求之授以一符一呪語曰做得著穿緋穿綠做不著書符賣藥由是靈應人求之醫隨意用藥服之卽見效

葉文詩麗水人本儒家子爲天慶觀道士時稱葉書記嗜酒善詩畫山水人牛閉戶累月出則羣兒環之或與之衣錢則悉與路人每嚴寒浴於溪寶祐甲寅十二月旦浴於觀池擲其衣獨臂二草履作偈云似癡非癡似醉非醉竹杖芒鞋落魄半世曠清風明月逍遙流水白雲自在端坐靜室而逝旣葬人或遇於路



慶州府志卷之三十一  
跡之又不見咸以爲仙去

曇法師本瑞安人來居青田縣之慈仁院出入禪機尤善吟咏每一月或半月不火食人異之秦少游謫處州時與曇相好後去與曇留別詩曰緣盡山城且北歸此生相見定難期寶池異日蓮花上却說如今結

社詩

清溪道士不詳其名字修煉於青田山之混元峯丹成田產青芝故曰芝田山曰芝山溪曰芝溪丹井尙在相傳有詩白石分金井青芝布玉田古今人易老片月下伊川

余綱青田黃巖人郴州助教余正夫子少業儒長慕老莊之學自號修真居士白玉蟾訪之不遇題詩於壁曰半斤雷火燒紅杏一點露珠凝碧荷錦帳中間藏玉兔銀瓶裏面養金鸞鉛花朶朶開青蕊汞葉枝枝發翠柯我欲刀圭分付汝料應汝未識黃婆

朱希常青田海西人住梅溪學老子術政和間從洞元妙應居士吳應能入內祈禱上嘉之號凝妙大師授右銜鑿誥劄差知濠州南華觀未幾辭歸築庵於連雲山名曰南華庵丹成尸解而去丹井與手植花木至今有存者



崇福禪師縉雲人年二十一祝髮於聖壽寺不啖酒肉  
貌偉神充景祐二年大旱邑令同詣虬溪百丈潭請  
水忽有龍見爪去履一隻入波底歲再旱師復至潭  
所忽湧出舊履甘雨踵至人敬信之後入涅槃塑像  
於寺遇旱禱必應

了翁禪師縉雲箬川人生而異香馥郁左手文有陳字  
長爲慈相寺僧後住臨安陳寺人有疾者以水灑地  
泉卽湧出人飲卽愈徽宗賜袈裟錫此號

趙初暘縉雲人字必復右掌有雷使二紅字學道術能  
役鬼神治疾無不愈歲旱呼吸可致雷雨時令小兒

伸掌書一雷字合之開手卽雷鳴兼能辟邪嘗賣雨  
於臨安懸墨汁咒符雨點皆黑人稱趙賣雷又稱趙  
雷使

徐元瑄玉壺觀道士理宗時應詔祈雪用粉筆書青紙  
爲五出者進曰翼日辰時必雪及期果然賜號紫微  
惠濟先生

周景福縉雲人仙都道士居仙水洞辟穀晏坐百餘年  
後仙去

智覺大師縉雲人政和中爲正等院僧熙甯四年用檀  
木造如來像及二塔庭生靈芝芬馥異常後御賜章



服錫此號

祖謙禪師世居松陽西屏山游京師與蘇東坡友善嘗  
爲公設茶公遺之詩曰道人曉出西屏山來施點茶  
三昧手忽驚午盞兔毫班打作春甕鵝兒酒天台乳  
花世不見玉川風液今何有東坡有意續茶經要使  
祖謙名不朽

雪堂和尚葉姓松陽人曾參指渾佛眼二師乃大悟遂  
遍歷名山士大夫多敬之

守常松陽人自號翠峯遍歷名山參謁老僧晚年乃大  
悟作爲偈誦深造理窟後坐化

劉應真字從道松陽人受籙於龍虎山張虛白傳法於  
汪惟德元祐間召至京師主上清儲祥宮賜紫衣號  
靈寶虛應有道德經解意行世

項舉之字彥昇七歲爲遂昌紫極觀道士大觀庚寅往  
汴京九成宮會金明池早應詔符召池中龍舉之挺  
劍結步池水卽湧溢有七巨魚浮水上宛如北斗之  
次雨隨沾足詔改觀爲紫極壽光宮賜殿額及田租  
政和丁酉召赴闕授紫虛大夫葆光殿校籍爵秩視  
朝散大夫父禮年百歲亦蒙恩授宣教郎

范叔寶遂昌人字子珉年十六爲道士宣和間隨師適



京師一日遇長髯道人授以畫牛術由是得名言人禍福無不驗行步若飛每歷處温台衢婺率三日而周至青田劉氏壁間畫一橋三虜人自題其上衆莫喻意未幾金亮稱兵淮南乃信爲異人隆興間郡守錢公招之寓天慶觀一日自郡醉歸夜半坐逝瘞後有人數見之於茶肆或一時數十處皆見之淨空禪師聞人有戒行嘗創精廬於遂昌之大樓巖翼日徙居龍安洞有第四泓號龍井師振錫其側有黃龍出受戒至其巔虎狼蹲踞師叱之曰亟去吾欲此居遂結庵於中後歸弋陽白花巖寺未幾入寂寺塑

其身置大殿僅百年一夜假夢於其徒欲還本寺乃迎以歸今像猶存遠近遇水旱昇像出禱願往則輕如一羽不願則數人莫能舉鄉人敬信繪其像供之明慧婺州人政和初祝髮於遂昌興覺院初學天台教續初衲子衣參四明天童山宏智禪師頓悟性宗爲首座衆請主報願法席未幾往南明山建大緣事以禪衲奔湊遂挈囊鉢之永嘉江心龍翔駐錫西堂郡守知之亟請領院事力辭復還南明山乾道丙戌冬結跏趺坐白衆而逝

章思廉遂昌人名居簡以字行少業儒以經學名三舍



既少所志 卷之三十一  
既有悟遂棲跡邑之壽光宮終日默坐蓬首垢面出  
則履步如飛動作語言皆禍福所寓鄉人以神待之  
高宗遣黃門董御藥齋香致禱書慎乃在位投之未  
幾孝宗受內禪蓋慎孝宗名也以至隱語告人疾病  
吉凶如響應乾道丙戌郡守錢公竿迎舍郡齋兩日  
不食惟日飲醕酒間出游半日而歸因問呂洞賓今  
何在答曰正在張公橋洗紙被卽命駕往謁之至則  
若有問曰此思廉小兒饒舌矣一日語守曰吾欲歸  
乃端坐而逝瘞少微山後有人見其持隻履在東陽  
洞邊釣魚發其瘞惟隻履存嘗有詩曰得太極全體

見本來面目先天一點真後天却是屋

董得時遂昌人理宗時充御前祈禱符水道士咸淳冬  
祈雪立應特賜龍翔宮修真通元演法法師

吳應能龍泉人奉靈宮道士雜用符水治病祈禳請禱  
其應如響崇甯中上聞而嘉之給驛召見戲術甚奇  
上優寵命改奉靈宮爲天甯萬壽之宮御賜書額仍  
賜號洞元妙應先生尸解賜葬隱真觀後

本覺僧博學能詩嘗輯名僧家諸書成編年由釋迦至  
達磨迄宋凡三教通於佛者無不載題爲釋氏通鑑  
癡海龍泉人崇因寺僧多騃故號爲癡海耳無垂珠脣



不蓋齒其師謂曰汝貌陋福薄宜自勉癡海感其言  
日至東廊觀音堂焚香百拜每一拜以手禡落其昏  
弁耳三年不怠不覺上昏下垂而兩耳及肩癡海拜  
不已一日睡於蒲團夢所拜觀音垂手摩其頂曰賜  
汝聰明福相寤覺心境廓然如脫重病遂通諸部經  
典後著金山水陸儀文盛行於世永嘉江心寺碑其  
手筆也  
黃十公慶元人嘗樵於仙桃山見二叟對弈得餘桃啖  
之觀弈未竟歸已一載矣遂居百花巖二十年坐化  
石上遺跡迄今在祈雨多應

祖澤友善僧新剃髮於佛事未甚諳一夜孤燈隻影習  
爲梵音誦孤魂文鬼物羣集啾啾有聲自後再投本  
師坐禪修定壽一百餘歲無病坐化

梵公慶元人嘗爲隸人因邑令刑峻公用葱貯血匿杖  
中行杖見血刑者往往得從減一日令見公不履地  
三尺詢其故大異之無何遂飄然去白鶴山廬其上  
一意修煉功成冠石臼千斤登山岡羽化

清辨禪師宣平人乾德間得道於烏巖寺每騎虎下山  
創淨妙寺工畢其虎誤爲鄉人所殺後知爲禪師虎  
自悔捨田十一畝入寺償之至今寺有償虎田



元

以假號空中棲禪於白雲山四方之侶聞風來赴履滿  
戶外至元丙子夏一日援筆書偈曰地火水風先佛  
記掘地深埋第一義一免檀那幾片柴二免人言無  
舍利跏趺而化

劉雲心名德邵麗水人學道於妙成觀善琴賦詩精意  
元學郡有疾病水旱必禱之謝遺俱惠貧窶平居無  
身外貲眉間有七黑子若北斗狀至正庚寅年八十  
八六月二十五日沐浴坐於正室索筆書偈而逝  
吳自福麗水人號梅澗學道於少微山晚年益究黃庭

道德之旨年至八十無疾而逝劉伯溫銘其墓

白雲禪師麗水人年十五薙髮越五歲遊七閩後居白  
雲胡深嘗造問之曰滅却心頭火特來參老禪師曰  
將軍來太早妻伴別人眠深怒欲刃之師曰心頭火  
未滅畧撥卽生烟深愧謝復問師曰若問前程事古  
月落西川後深提兵至福建征陳友定戰於西陽兵  
敗爲友定所擒死之果如其言洪武己酉詔起天下  
名僧師旣赴卽還杭居虎跑明年歸衆堅留之師曰  
葉落歸根吾所願也遂回居白雲五日書偈而逝

趙嗣祺縉雲人字虛一學仙入武夷延祐元年被命領



廬州府志 卷之二十一  
仙都宮事承詔徧祀東南名山賜號教門真士元明  
通道虛一先生

明

海濱處州衛人姓吳氏父松左所百戶濱自幼茹素稍  
長從師習梵唄不肯還家父母雙殂杖笠入終南山  
遇異人授以醫目方劑且諭以遇洪則止用其方療  
人有效至南昌相國張洪陽公建廣福堂以居之戒  
行精潔徒衆日聚爲江右士大夫所重嘗一再至栝  
栝人欲留之不可得亦高僧也

祝明道麗水人幼隨舅入元妙觀端靜寡言諳習科典

爲觀都知郡旱潦符水雩禱有應凡有大役檄以督  
工刻日奏竣尤精厯家言選擇時日尅應不爽年踰  
九十示期而終

聶允瑞字朝祥麗水人世傳陰陽禱祝符水禁咒術郡  
守馬公署中崇異晝見患者十數人召瑞治之書符  
宣咒洪聲如雷患者竦汗立起其崇息凡里中疾病  
延之祈禳屢有徵應

唐萬方青田人事親以孝親歿廬墓三年終身蔬食縣  
令韓君冕式其廬贈以束帛不受遂披剃隱於普陀  
山不知所之邑人王用臣爲之傳



施舉縉雲人學道妙成觀號紫霞深得洞元之妙傳其道者甚衆教主張真人聞其名寫紫霞山房圖贈之洪武中其徒王以節爲樂舞生事連坐軍士以繩繫杖擊促其行繩杖自解折捕者驚赴京得釋而歸永樂元年壽八十四一日語其徒曰往來合散理之自然我歸矣遂坐逝

鄭瑗號丹崖仙都法師初受龍虎山王時佐傳度甚得其術符水最靈能驅縛邪魅逐疫消災年九十七而逝

靈峯和尚縉雲人卓錫龍游之靈山廣闡法要弟子從

游者衆至今稱祇林云

潘自然松陽逍遙觀道士居雲巖善燒煉之術號召風雷及神將每夜有神燈懸於門當出行燈卽前導有求符者迫切治爨老人因自然別出遽呼神將承命往治自然歸責老人有泥神滕申君詣前曰彼五世法官偶有過上帝謫下待公庖公僅以三世法非彼若毋責爾也語畢卽退步行復其位

周洞微有元術永樂中召高道尋章思廉洞微應召入見期以某日廉當來朝至期果如其言極見寵遇後隱不出



王知善永樂間出家三官閣遇異人傳符咒之術大有  
法力能呼雷雨善治病年時大疫請法師者履填戶  
外不得往給符與之飲水而病者輒效

楊清隱法名一真永樂間敝造飛霞棲道房廳屋數十  
間又建立三官閣刻木爲諸神像用鐵鑄各宮觀爐  
瓶置田十三畝年九十餘謂其徒曰爲我浣衣我將  
往明日具衣冠坐石上而逝衆聞往視三日後顏色  
和婉如生

邵太初龍泉人爲陰陽官嘗學符水於龍虎山正統間  
知縣張羽延之祈雨築壇於台山之陽叱符揮劍雲

卽滄合握訣步罡則雷電交作俄而虹貫雨收太初  
曰此必撓吾法者索之壬癸草澤中見隱真觀有道  
士吳友清坐留槎洲中冠髻間藏一小符衆責之笑  
曰吾戲太初耳乃咒其符投之水傾雨如注

道涓正統間爲龍泉縣僧會駐錫鼇峯崇因禪寺嚴戒  
持素景泰庚午正月二十八日辭別鄉里回山端坐  
雷音堂遺偈云觀世間八十一一卽是三三卽一團  
團爍破去來蹤白日虛宮轟霹靂偈畢而逝鼻出雙  
箸光瑩如玉時年八十一

季源澄龍泉人萬壽宮道士習傳道家符水宏治間大



旱立壇於天台疊嶂亭巔祈雨輒應

處州府志卷之二十一終



